

MAKE Yesunomo Makeyo Wia Mekaneya

Ali Atoa Ue Motokama Yakene Yoneyo

Mo Wima Yakenemo

(Matiu 3:1-12, Luke 3:1-18, Yone 1:19-28)

¹ Ipa Yesu Keraisuke epetekoakane agale titiane akakuna.

² Namolo namolo papete Akolaline agale akane ago pade Aisaiayo eya wa wia mekaneya. Nipa Akolaliyo mana-pala papete oa piane toa wiamekakome okome

Ne naniko pomotoane anu agale oa aua yawatekago namolo takoane moane wetekou. Nitikolu pokome ne poateka ka nodokakama poo.

³ Nipa ali piame ta ludu panagome eya wa mo wima yawoo. Ali Muno noateko ka nodokakapia, one yawateko ka-kitika kiyotokakapia toatino toe wa einago taatekoakame mo wima yawoo wa Aisaiayo papete wia mekapianeya.

⁴ Eina wia mekapiane toapa Yone ali piame ta ludu taatekoakame mo wima nekeneya. Kini tokoi poaneleke Akolaliyo kiwi wiou wa po letu mekakana keetapemotono eni poanele tewitikoa wawa ue moamene wa ali atoa ue motokaneya.

⁵ Nipa Yudea ta pikoye Yerusalem takeka ali atoa peya one mekata note kini tokoi poanele

i i wa toawea ootapekoli nipa ue moe wa Yodane
uele kakome ue motokakala taneya.

⁶ Yone einago taatekoaa nokomepa kamelo kai
pineme latiane mamina kawa ni pitimekawe
kai kepeneme latiane matiu kawa taneya.
One nakene neepa apio-pala koyapo ego ueta
nakeneya.

⁷ Nitane agome mo wia kakome okome no
litimotokakome ele kule telekole toa no moa
patukako ago noademe toko. Nokolopa auapeane
one kawa yene kekatukuyake pa ago tekene mea-
mukakene kekamele toamoko.

⁸ Opii kiwi pa ue motokakene tuku. Einago
nokomepa Epetane Yomini motokademe toko wa
oma yakeneya.

Yesuyo Ue Mootokaneyake

Setanuyo Likoa Enoai Tanemo

(Matiu 3:13-4:11, Luke 3:21-22, 4:1-13)

⁹ Eina-petepa Yesu Galili ta keneke piko
Nasarese ta kawa Yone kakata nokale Yodane
uele ue motokaneya.

¹⁰ Nitikale Yesu uele kawa aka matanuke
pogatekoaa pokome enekale eina eina tibu
patetepikale Epetane Yomini weuwe keneya
tibu mea ketipea nome pinali oneke pitanokale
enaneya.

¹¹ Nitikale a tibuke agale ludu nokome okome
anu manago nepa anu kolotini ago. Neke tokoleke
no kolotine meku wa akeneya.

¹² Nitikale eina eina Epetane Yominiyo Yesu ali
piamene take poano pa wa aua pekeneya.

¹³ Aua pekeneyake lene timini togoikoa padeka
noi kakoa (40) ta lia pataka toa Setanu nome likoa

enoai taneya. Eidapa yo tane kai eya pakeke pome mekake edelo ali-kiti note auape auape toa kananeya.

Yesuyo Mou Tagi Tane Ali Tuyono

One Litima Noe Wa Kayo Oa Motanemo
(Matiu 4:12-22, Luke 4:14-15, 5:1-11)

¹⁴ Yone po yapu moa pitikatekaneyake Yesu Galili take pokome eni ta ludu Akolalinemo ali atoane wene epetekakome tanemo iiwa mo wima yakeneya.

¹⁵ Nitikome okome eina oa piane agale taatekoia toateko-petepa opi. Akolaliyo kiwi talo tokole keleyo witateko tigotoma nokono, kini namolo poane wene wia wawa kini wene epetekoane uku agaleke wene matoa meamene wa oma yakeneya.

¹⁶ Nitoa Galili ue matanu ludu kokotoma ponokome enekale odene wamena Saimone Aderutame kini tanele tekete mou tagi toa kakoli enaneya.

¹⁷ Enekome okome mou tagi toa mou toa ali atoa motokakete toatikile olaukouno, no litima noe wa okale

¹⁸ eina eina kini tagi ka tewitikalogoa Yesu litima pekeneya.

¹⁹ Yesu eniya liti kutu pokome enekale odene wamena Yame Yoneta Sebedine manata ue dipike mekete tagi ka pilianeka lipua mekoli enaneya.

²⁰ Enekome okome yukuyagota wete noe wa kayo oma ponokale eina eina pupu yeneka etene-pala ue dipike memotoa Yesu litima pekeneya.

Ipono Awitaneya Meane Ago Latekanemo
(Luke 4:31-37)

21 Yesuyo Kapaneame take pato wa einali-mene-pala opia pome mepaney. Pome mekomepa ko mea pupu toamene-pete losu yapu pome olaukapaney.

22 One eni olaukakale yatekete peyame ekete Mosesene totono pine toa olaukaki yename ikina toa i agomepa wamokono, one weneme-kama pademo pademo tititikoa okono, opa agale pinagomepa i okono, yakatoe wa kā oa kakeneya.

23 Einata einapete poane ipono awitaneya meane ago losu yapu mekome telo okome okome

24 Nasarese Yesu nepa totomekota edade noka-pe. Toto wiade noka-pe. Nepa Akolaliyo takoa moa kakapiane ago toko-la wa tāyo ootapekale kikoa okome okome

25 agale wia tēiano, winago tewitikoa wete takoa pa wa okale

26 einago itonoke aua pitikoa petekakoa kawa tāyo telo ootapekome takoa pekeneya.

27 Nitikale enekete e yene ete oto wa yakaate tekete ekete one eni oka agalepa edane agale patuno, one weneme-kama pademo pademo tititikoa okoya tokome ipono-kitameka oneme okole-kama yako tiki wa kā oa kakeneya.

28 Nitaneyake one tanemo Galili ta pikopeyake wete oa pupitikatapeney.

*Eya Kuya Yene Tane Ali Atoa Latekanemo
(Matiu 8:14-17, Luke 4:38-41)*

29 Enile tomotokome Yesu losu yapu tewitikoa pome Saimone Aderutane yapu pato wa Yame Yoneta-pala opia pekeneya.

³⁰ Eni yapu pene nome mekaka Saimone nato-nane nine one kaue poto yene taneya piko wa okoli

³¹ einakatue pikata pome yono moa kamotokaneya. Nitikale eina eina poto yene teitakale latoa kakome kini nee takoa lawetaneya.

³² Einata einapete lou pene pipaneyake eya kuya yene taneya mea ipono awitaneya mea tane yene peya aua pato wa kini oya-mikitame Yesu mekata aua nekeneyea.

³³ Eni take pitane ali atoa peya note kago liti kolike apua takoa kakeneyea.

³⁴ Nitikoli enekome eya kuya yene taneya nekene-kiti lateko ipono-kitika takoa poe wa wetekoa taneya. Nipa ipono-kitame i agopa Yesu toko-la wa wene tokoli tokome agale witoa wameo wa takoa wetekatapeneyea.

Yesuyo Galili Ta Ludu Mo Wima Yakenemo

(Luke 4:42-44)

³⁵ Podolikama ta wete patameneyake Yesu kamomotokome ali piamene take kidene pome kowitipaneya.

³⁶ Nitadekale Saimoneyo tuku topato wa one oyali-kiti-pala opia pome tuku toawineya pekeneyea.

³⁷ Nitoa tuku toawineya pote enamutukete ekete nepa kuka ku ali atoa peyame tuku toa kaki-koli okome

³⁸ ete yeka ta ludu pitiki ali atoaka anu akama yakuna agale oane mema pamedeku. Taatekoane eina agale akadene ni nokouno, tone opia pekete patono noe wa pekeneyea.

39 Patono noe wa pokomepa Galili ta ludu losu yapu kaka toa Akolaline agale mo wia akama pome ipono-kitika takoa wetekoa taneya.

*Yesuyo Kedime Nakene Ago Latekanemo
(Matiu 8:1-4, Luke 5:12-16)*

40 Kedime nakene ago pade Yesu kakata nome wadini tukupia kowitikome okome nemedo no epetekouno wene pikepa nipa oyake epetekoano ta wa kowitikale

41 ela motokome yoname mitikatekakome okome nitouno ta. Neke eni yene takoa pomotoane uku wa okaka

42 eina eina takoa pokale latoa kakeneya.

43 Yesuyo nititikoa kakome pubu okome okome etene pade ali atoa enekeka anume ne latekakumo kotukoa ikileka toamoa.

44 Nitameneya eyaka topamene. Ne i agopa kedi pitaneyya mekanake opi i latoa kakona wa yete pade ali atoame wene tomotoapa Moseseyo tamene wa papete oa pianele topamene. Nipa Akolalike lodo yotokoai toko agomekota peke oneke paduya lodo yotokatekoya aua poke mepoano pa wa wetekaneya.

45 Yesuyo nimo okale yakoake tagataapea ta piko peyake one eni latekakanakamo oa pupitikat-apeneya. Nitikale tokome ali atoa pitikoika Yesu keleyo poukome toake ali atoa apua takakaya tokale padeka lono katekoa pome ali piامene ta ludu pima yakeneya. Nitoa pokake ali atoa koukoaa one kakata note-kala kakeneya.

2

Yesuyo Muku Muku Toameneya

*Pa Pia Meane Ago Latekanemo
(Matiu 9:1-8, Luke 5:17-26)*

¹ Yesu eina-meneke yawa mea wa wakapea Kapaname take nome menaneyea. Nitikale Yesu wa wakapea nome one yapu meko wa okoimo kugu

² yakatekoa ali atoa koukanokolipa keika yapu luku kawatekoi pakeka piameneya. Akolono kago ludu-kitika nateya pakeka piameneya edeya takatapeneyea. Nitaneyake yapu keneke kakome Akolalinemo i i wa oa kakaka

³ ali tuyonome eya ago muku muku toameneya pa pia kakene ago leyo leyo toa aua nekeneya.

⁴ Nipa yapu edea takatapeneyea tokome Yesu kakata pinele aua namele toamokale aka yalini ludu aua penaneyea. Nitoa ponete yalini kea po kakoa leyo-pala keti Yesu kaka pitia tewitikaketikaneya.

⁵ Yesu i agome kini oyago oyake latekamele toko wa wene tekete tadekoile enekome Yesuyo yene tane ago-pala okome anu mana neke toma noka poaneleke Akolaliyo po letu mekakana keetapekene neke poanele kogakuna wa okale

⁶ Mosesene totono pine t^oa olaukane ali-kiti eniya liti mekete kini tepene eya wa wene pia meaneya.

⁷ Imopa i okono, edekolo oko-pe. Ali atoame toma nokoi poaneleke mekane po letu kea wakilepa Akolaliyo odene tokono, i agome Akolali tekome oko wa wene poaneyea meaneya.

8 Kini eni wene pikoile tetoa enekome Yesuyo okome wini tepene wene kibutukoa mekipa dekolo tiki-pe.

9 I ago-pala ukule tamele tadeko wa kime wene tomotoanepa yene tane ago-pala edemo wane omotoa iki-pe. I ago neke toma noka poaneleke Akolaliyo po letumekakana keetapeku wane omotoa iki-pe. Wete kamoaa ne aua nokoina leyo-pala aua pa wane omotoa iki-pe.

10-11 No Ali Yatenane Oyago itonoke mekenepa ali atoame tokoi poaneleke Akolaliyo po letu mekakana keetapeamele tadeko wa kime wene tomotoanepa yene tane ago-pala eya wane uku. Ne aua nokoina leyo-pala moa aua neke yapu poano, kamokoa pa wa akeneya.

12 Nimo oka oka e yename nepikoa memo-toa einago kamokakome one aukoina leyo-pala moa aua pekeneya. Nitao pokale enekete ali atoa kakoi peyame kā oa kakete ekete namoloka toamokoinakalepa i tokono enatoe wa Akolali kei pia kakeneya.

Yesuyo One Pukuka Matiu

*Ne Litima Namene Wa Kayo Oa Motanemo
(Matiu 9:9-13, Luke 5:27-32)*

13 Nitaneyake Yesu Galili ue mine matanu wa pome kapaneya. One eni kakata ali atoa peya note oboa kakoli Akolaline agale olaukoa kakeneya.

14 Nititikoa pokome enekale eya ago Lipai Alepiasine mana takesi kue motokoai tane yapu keneke mekale enekome okome no pukuka tone patono noo wa oma ponokale kamomotokome Yesu pokaka litima pekeneya.

15 One yapu nee natono noo, pata wa Matiuyo koua pokale Yesu pome mekome nee noa meaneya. Nitikale takesi kue motokama yakene ali-kitika Yu yenane totono litia toamene ali-kitika Yesu-palaka one oyali-kiti-palaka eida opia mekete nee noa meaneya. Dikane ali kainya mati one pokaka litima pekeneyea.

16 Yesu dikane yene-pala opia mekome nee nakale enekete Parisi ali-kitameka Mosesene totono pine toa olaukane ali-kitameka Yesuno oya-mikiti pitia yatekete ekete Yesupa dikane yene-pala opia mekome nee noa mekono, edekolo tokoto-pe wa yakananeya.

17 Nimo akedekoli yatekome Yesuyo okome dokosa agomepa yene toameneya meku wa iki-kihi edoa nome latekamotoa-pe. Yene taneya meku wa iki-kitipa nipa nome latekanoo. Nipa poanele toamuku wa iki yene kini namolo poane wene wia wawe wane oadene nokouya mena. Poanele tuku wa iki-kihi odene auapeadene nekene uku wa Yesuyo akeneya.

Akolali Wedoa Kowitadetepa Nee Eya Tekei

Wawa Noameneyake Pitia Yakanemo

(Matiu 9:14-17, Luke 5:33-39)

18 Wa padepete ali atoa ue motokama yakene ago Yonene agale litia tane yenameka Parisi ali-kitameka Akolali wedoa kowitadetepa nee eya tekei wawa noamoa pa meaneya. Nitaneyake pade ali-kihi Yesu kakata note yatekete ekete neke agale yakoa nepala opia yaki yenamepa enile toamiki. Edekolo toamikiti-pe wa yakaneya.

19 Nitikoli okome panagono atoa motokakita atoa motokagongo oya-mikiti onepala wedikete wediapa nee eya edoa wawa noameneya pa memotoa-pe.

20 Wa naniko ete yename atoa motokago padeka aua poatiki wini tigotoma nokona. Eni toateko oi noka-petepa nee noameneya wawa pa meoi wa Yesuyo akeneya.

21 Nimo ootokoaa kakome pedoa agale pade okome okome panago one mamina namoloya pilikalepa weneya pue moa namoloya eni pilikata lapukoa lipuko patu. Nitamoo-li. Enile tootokoado uele abe kogalepa weneya pueme ete ete toa edema pokome pilikutu too wa Yesuyo akeneya.

22 Wa agale pade pedoa okome okome gerepi po ku ue weneyamekalepa meme kai tabeme latiane mete namoloyake oyake peia moamoo. Eniyakedo peikalepa gerepi po ku ue weneya tokome lako yati kawa mono mono okome kua paka yoa pootapeoo. Nipa eni kai tabeme latiane meteka kua tि tae witapeoo. Pene po ku kotiketepa meteka peneyake tिja lobutua piamedeko wa Yesuyo akeneya.

Ko Mea Pupu Toamatekoileke

Pitia Yakanemo (Matiu 12:1-8, Luke 6:1-5)

23 Yu yene kini ko mea pupu toamene-pete pade Yesu panagono witi ipe ludu pokaka one oyali-kiti one-pala opia pekete witi ku deya tukaka pekete kotima pekeneya.

24 Nitikoli enekete Parisi yename Yesu-pala ekete tone ko mea pupu toamateko-pete kekoa wawa toamatekole eni tikino, ku kotia eni pupupa dekolo tikiti-pe-koli okome

25-26 Depidi one-pala **toa** yakene ali-kitika kobu tokale tanemo oi moamokoiya-pe. Eya taneya. Tobou ago Sologo Depidi litia aua pokale **toa** yakomepa kobume tuaneya tokome Akolaline wikakane yapuke lobutukoa kapaneya. Nitoapa Akolaline pikane palawe wane moa nootokoa one oyali-kiti i nee noatino noe wa moke toa tatika tatika taneya. Akolalike lodo yotokoai tane ali-kitame odene dikane palawe wane namele taneyake nitaneya. Enipa ako odene mekome Akolalike lodo yotokoai tane tobou ago Abiasa meane-pete kini kekaneleke Depidiyo taneya.

27 Yesuyo nimo ootokoa kakome okome Akolaliyo ali atoa auapekomepa ko mea pupu toamatiki-pete pa ko meamene wa oa pianeya. Ko mea pupu toamene-pete padeya padeya kekaneya latikamotoa akeneya mena.

28 No Ali Yatenane Oyagomepa ali atoa ko mea pupu toamiki-pete mekete toatikileka i i wane oyameane talo toane meku wa Yesuyo akeneya.

3

*Yono Lokane Ago Latekanemo
(Matiu 12:9-14, Luke 6:6-11)*

1 Wa pade-pete Yesu losu yapu wa pokome enekale yono lokane ago pade eida mekale enaneya.

2 Nitaneyake pade-kitamepa Yesuyo i ago epetekako patu wa lene wikaneya. Nipa ko mea

pupu toamene-pete kini kekanele tomotadiya wa kakete taneya.

³ Nitikoli Yesuyo yono lokane ago-pala okome okome oto noke kanoo wa ootokoa kakome

⁴ e yene yatekome okome tone ko mea pupu toamoko-petepa edele tokala tato-pe. Ali atoapalapa padele padele epetanele tato-pe. Poanele tato-pe. Tuamele toko agopa toa moato-pe. Wia tukato-pe wa okale agale waametekoa pa kakeneya.

⁵ Tepe kolotini lupi tootapeneya kakoile enekome kotimi luaneya kawa tepe-pala we tokale kaka. Nitoapa o yene leneme enoa unukamu tootokoa kakome yono lokane ago-pala okome neke yono kutu lido akoano ta wa okale lido akoa enekale one yono epetekakadeka.

⁶ Nitikale enekete Parisi ali-kiti Erodeke timini kawa yakene yene-pala akolono koukapeketepa Yesu wiato wa one wia tukatekoi oi pedoa pi-aneya.

Ali Atoa Yesu Litima Nekenemo

⁷ Nitaneyake one oyali-kiti-pala Galili ue mine pato wa tewitikoa pekeneya. Eni pokaka Galili yene peya mati lewi lewita pia obomoa nekeneya.

⁸ Nipa Yudea ta piko peyakeka Yerusalem takeka Idumea ta piko peyakeka Yodane ue eklono piko takeka Taia Saidone tata liti enika eni pitane ali atoa Yesu kakata note-kala kakeneya. One toma yakenemo kugu yatekoiya tekete nitaneya.

⁹ Nitaneyake ali atoata i kakoyame one dekoino, ue dipike pone mepouno, ue dipi nodokakoa oto aua noatino poe wa one oyali-kiti-pala akeneya.

10 Nipa yene tane ali atoa peya mati latekakale enekete ete yename kini tane yene latekamotoa Yesu mitikada wa lekoa apua takatapeneyake ni akeneya.

11 Ipono awitaneya meane yeneka nokoli kini eina awitane iponame Yesuno lene timini enekete one kawane aua pitakete ekete nepa Akolaline mana wa okala taneya.

12 Nimo okoli ipono-kiti kikoa okome okome no i agopa dikane ago wa widikoa tqawea wameo wa kikoa akeneya.

Yesuyo One Oyali-kiti Tuku Kakoa (12)

Takoa Motanemo (Matiu 10:1-4, Luke 6:12-16)

13 Nititikoa tono pade lewia pome kakome one takoa moateka ali-kiti noe wa kayo okale nekeneya.

14-15 One-pala opia yawatekoi ali-kiti tuku kakoa (12) one Aposelo ali wa moa kakakilepa Akola-linemo mo wia oawineya pote ali atoake awitane ipono takoa wetekoa tomotoa taneya. Nipa one tele patu kautakoa kakete nitimotoane wetekou wa moa kakaneya.

16 Eya ali-kiti takoa motaney. Pade Saimone one pade ibini Pita wa oa metaney.

17 Ni Yame Yoneta Sebedine manata. Yesuyo einagotane ibini pade Boanesisi wa ibini oa metaney. Boanesisi wapa tono witikagota wa okome akeneya.

18 Ni Aderu ni Pilipi ni Batolomiu ni Matiu ni Tomasi ni Alepiasine mana Yame ni Tadiasi ni Kenane take Saimone

19 ni Yudase Isekariose. Yudase einagopa Yesu poi tejane yename wimotoa moa meateka ago.

Yesu Tobou Ipono Belesebulene Tele Patu

*Kautakoa Kako Wa Tea Akenemo
(Matiu 12:22-32, Luke 11:14-23, 12:10)*

20 One oya-lawe eni takoa moomotokome Yesu wakapea yapu nome mekale ali atoa wa obo-moa note edea takatapeneya. Edeya takatapekolii Yesuka one oya ali-kitika nee noatekoi pake toameneyaa.

21 Eni tanemo kugu yatekete onekameyo ekete ekee, leau akeneuya yakome tokono, enemopato wa Yesu moa pikoa kawadete nekeneyaa.

22 Mosesene totono pine toa olaukane ali-kiti Yerusalem ta kawa keti note kakete ekete Yesu i agokepa Belesebule awinome mekome toko. Ako odene meko tobou ipono Belesebulene tele patu kautakoa kakome tokome ipono-kiti takoa wetekakala toko wa tea agale akeneuya.

23 Nitaneyake Yesuyo ali atoa one kakuta noe wa mootokoapa pedoa agale-mene okome okome Setanu pinali one tiko wa edoa takoa wetekamotoape.

24 Pitikali puutakutukoa meketepa nipa wili walai wa tadataapeoi.

25 Wa odene yapu pitiki-kiti ete oto wa poita toa winali yotoketepa kini eni yapu pa tumu tokaneya pimotoa wawa poi.

26 Edikoapa Setanu one yagono-mikiti-pala poi toa mekomepa nipa one tele tetoa tii tae oa witikatapeneya tokome one yeneka ete toa atuma poi wa Yesuyo akeneuya.

²⁷ Nimo ootokoa kakome pedoa agale pade okome okome telekagome-kiti one yapu pikoyakiti pa yopia mekalepa kode agome yapu bulukoa nome onekeya oyake moa pamele toamoko. Nitamele toamokoyake kode ago kotikataapeado nokomepa telekago poome lutua piiloga onekeya peya oyake kode moa poo.

²⁸ Ali atoame padele padele poanele toa Akolali tea kawaka wa nanikodo ae, inapa poanele tekene tadeku wa wakolipa nipa Akolaliyo kini eni poanele tokoike po letumekakanapa keetapea wawa kibu moamoo.

²⁹ Wa panagome Epetane Yominilepa Setanule tetepo takakalepa Akolaliyo one eni poanele tokake po letumekakanapa keamokome etene kibu moo. Dikane agome toka poanelepa pa pia kakale Akolaliyo kogakileka toamoo wa Yesuyo akeneya.

³⁰ Enipa Parisi ali-kitame Yesu i agoke poane ipono awinome mekome toko wa okoli tokome ni akeneya.

*Yesuno Nine Wamene-mikitika Oneke Nekenemo
(Matiu 12:46-50, Luke 8:19-21)*

³¹ Nimo oa kakaka Yesuno nine wamene-mikitika koli note kakete ekete Yesu oto noo wa akoe wa panago moa wetekaneya.

³² Nitikoli Yesu kakaya liti oboa meane ali atoame ekete nekqua neke wamene-mikitika koli a note kakete ne noo wa iki-koli okome

³³ agauapa te-pe, anu wamene-mikitipa te-lawe-pe wa ootokoa kakome

³⁴ one unukoa mekoina ali atoa enoa unukakome okome agaua-loe anu wamene-mikitipa ika i mekina.

³⁵ Akolaliyo ta wa okole-kama litia tiki-kitipa agaua anu wamene laine-mikiti enina wa Yesuyo akeneya.

4

Nee Lene Pitikama Poko Agoke

Pedoa Akenemo

(*Matiu 13:1-9, Luke 8:4-8*)

¹ Wa padepete Yesu Galili ue mine matanu pome olaukoa meaneya. Nitaneyake ali atoa lewi lewita pia obomoa note-kala kakoli tokome ue dipike pogatekoia pome mepaneyea. Nitoapa e yene ue matanuke ete keneya kamotoa onepa ue dipike mekome

² pademo pademo oa metekilepa pedoa agale oa meaneya.

³ Nitoa olaukoa mekome okome kipala i ukumo yakoe. Ipe pinagome-kiti ipe ludu nee lene pitikama pekeneya.

⁴ Nitima pokale nee lene padekapa ka ludu paka tadoa pitaneyea. Nitaneta ini-kiti pukaneya note pitoai toa napekala taneya.

⁵ Ni nee lene padekapa kue pake pake tadoa pitaneyea. Tokoo itono nateya deya pianeya tokome wete tumikala taneya.

⁶ Wa naniko lou tigini kakale wete eni tototokoa tuaneyea. Teke itono kekulu wetekameneya tokome loume ni yoa tukatapeneya.

7 Ni nee lene padekapa tonipo pake tadoa pitaneya. Nitaneta tonipo eya nee lene-pala odeneka dekoa witakome tukatapeneya.

8 Ni nee lene padekapa itono epetaneyake pitakome leau akataapea witakome ku tukala taneya. Ku tukilepa padekapa ku kapidi kakoa kakoa (30) tua ni padekapa ku ege odepeta kadukoa wa tuku melepu kakoa (60) tua ni padekapa ku ege takupeta kadukoa (100) tua tokala taneya.

9 Kipala i ukumo yakou wa kale piiyakoa kaki-kiti kime yakoati wane uku wa Yesuyo akeneya.

10 Naniko Yesu one kidenemekata one mekoya liti oboa mekete yatekoina yene padeka-kitame one tuku kakoa (12) oyali-kiti-pala note eni pedoa okana agale pine pitia yakananeya.

11 Nitikoli yatekome okome Akolaliyo one ali atoa talo tokolepa papete kaukoa mema nekeneyake opi kiwi keleyo ooyameteku. Nitikuyake ete ali atoa-palapa nipapedoane agale-kama oane meteku.

12 Nipa Aisaiayo papete wia mekapiane toane taatekoane tuku. Eya wa wia mekapianeya.

I tqaweane uku yenamepa kini leneme enekoile enoa moamoa kini kaleme yatekoimo yakoa moamoa toi. Akolalikedo tepe kolotini pekoia pioi tokapa kini poanele tokoike po letu mekakanapa kea kibu moamoo tokake pa etepea pomotoa wawoo wa Aisaiayo wia mekapianeya wa Yesuyo akeneya.

Yesuyo Nee Leneke Pedoa Akene Agale

*Pine Toawea Akenemo
(Matiu 13:18-23, Luke 8:11-15)*

13 Yesuyo nimo ootokoa kakome okome ina pedoane okouna pine wene toamikino, ete idikoane pedoane oma pokou-kitipa edoa yakoa moadete-pe.

14 Ne lene pitikama yako ago adeka pikounapa Akolaline agale oa aua yako agoke okouna.

15 Nee lene padekapa ka ludu tadoa pitane adeka pikounapa eya tiki yeneke okouna. Pade-kitame Akolalinemo yakoa lukakili eina eina Setanu nome katekamoaa pokoo.

16 Nee lene padekapa kue pake pake tadoa pitane adeka pikounapa eya tiki-kitike okouna. Pade-kitame einagale yakoapa eina eina ke wa lukoa wedia meki.

17 Nitiketeke einagale kini tepene teke wetekameneya tokome Akolalinele pa tekei takaki. Wa naniko ele kuleme ke enekakale mea ni ete-kitame kipala poi teigoli mea tekete Akolalinele takoake wete tewitikoa wawei.

18 Padeka nee lene tonipo pake tadoa pitane adeka pikounapa eya tiki-kitike okouna.

19 Pade-kitame einagale yakoa moake kini kepene mama moa kini kamoya-kitike wene pitikakoa mea eya kuya moadiya wa tepi tokale mea tikili enika enileme Akolaline agale moa kautako. Nipa nee lene kū tuamou toa keneya pa meki.

20 Padeka nee lene itono epetaneyake pitane adeka pikounapa eya tiki-kitike okouna. Pade-kitame einagale yakoapa inapa Akolaline peku wa noa tiki. Nitikipa ipe nee kakoya kū tuma pou toa padekapa kū padeka kapidi kakoa (30) tua

ni padekapa kū ege odepeta kadukoa (50) tua ni padekapa kū ege takupeta kadukoa (100) tua toko wa Yesuyo akeneya.

Tole Udukatekoapa Okolo Moa Kauamoi

Wa Pedoa Akenemo
(Luke 8:16-18)

²¹ Panagome-kiti labo udukoapa okolo moane kaulogou wa yapu aua noko patu. Walai kene kekulu moane piou wa aua noko patu. E'e, edikakoya mena. Labo piatekota-kama moa pikala toko.

²² Padele padele kaukoa toma yakolepa naniko keleyo witatekole toko. Padeya padeya paigakoa pikoya-kiti naniko keleyo pikale peyame enetapeoi.

²³ Kipala i ukumo yakou wa kale piiyakoa kaki-kiti kime yakoati wane uku wa Yesuyo akeneya.

²⁴ Nimo ootokoa kakome okome kipala i oane metekulu yatekimopa wedoa yakoa moamene. Kime ete metekoi toa eni luku kotuke otoka mokala toi. Nipa ako pade-meneka oto mokala toi.

²⁵ Akolali one i peku wedoa nako agopa nipa Akolaliyo one peku-kama lawetema poo. Akolaline peku alekoa noa toko agopa nipa one eni lawetane peku nateya deyaka takoa pootapeoo wa Yesuyo akeneya.

Ipe Nee Kakoya Witakoleke Pedoa Akenemo

²⁶ Yesuyo nimo ootokoa kakome pedoa agale pade okome okome

²⁷ Akolaliyo one ali atoa talo tokolepa i wane adeka piane uku. Panago ipe ludu one nee lene pitikama yakanata eni nee lene tumia witoa

kako. Nipa ta lia patako toa-kama pinago pitikome kamotokome tomotoa toko. Tumia witakole pinago agopa tokolo mekoyake toko.

²⁸ Pinagome nee lene matalogoa paya nou toa mekoyake kadene tumia atepea witama nome tidiyo wia kū tua toko. Enilepa itonome-kama toko.

²⁹ Kū tua nodokoa kibutua kakale eina eina pinagome wakoa mootapeoo. Nipa one wakoane momotoa toko wa epei moa nome wakoa mootapeoo wa Yesuyo akeneya.

Kalipe Lene Deya Witakoleke Akenemo
(Matiu 13:31-32,34, Luke 13:18-19)

³⁰ Yesuyo nimo ootokoaa kakome okome Akolaliyo one ali atoa talo tokolepa edeya wane adeka piku patu. Edemo wane pedoane agale uku patu.

³¹ Akolaliyo one ali atoa talo tikilepa kalipe lene deya itonoke witako toa toko. Eni lenepa etene nateya wane deya tokome eteya yomo leneme moa patukako.

³² Eni lene deya panagome moa itonoke pitikakolo tumikomepa ate toa eteya yomo moa patukatapeko. Nipa yaita mati eni kakome yenene yeteka yukukata tubeya wetekako. Yenene etene tubeya wetekakolo tokome ini pukaneya note eni yomo todoke yene wiamele toko wa Yesuyo akeneya.

³³ Yesuyo Akolaline agale i i wa e yene oa metekomepa enika eni pedoa agale okala taneya. Nipa kini yakoa moatekoi kotuke oa mekala taneya.

³⁴ Akolalinemo eni oa metekilepa agale pedoakama oa mekala taneya. Nitaneyake one oyali-kiti-palapa kini-menemekete einaka eina pedoa agale peya pine ina ina wa tɔawea okala taneya.

Yesuyo Pupulege Tadalita Teitakanemo

(Matiu 8:23-27, Luke 8:22-25)

³⁵ Einapete lou wete pipaneka Yesuyo one oyali-kiti-pala okome okome eka ue mine matanuke witatono patono noe wa eina ue dipike lewia pome mekale

³⁶ ali atoa matanuke eida koukoa memotoa wawa one oyali-kitika eina ue dipike peapeteko pote mea Yesu-pala opia mea pekeneya. Mea pokoka ali atoa ue dipi pade-kitike mea opia pekeneya.

³⁷ Mea poadete pokoka pupulege tadalita kotikataapea ɻu wa noka matiyame ue pewikanokome ue dipike patua pitoa atukademe taneya.

³⁸ Atukademe tokaka Yesu ue dipi kuka lono nali yomo mokoa atu pia meaneya. Nitikale one oyali-kitame one kamotokakete ekete Ae, Tikisa ago toto ue nakoono, mama moameke atu pia meko-pekolii

³⁹ Yesu kamokakome pupulege kikoa okome okome kapakoa kawia wa wa okale pupulege teigaloganeya. Ue mineka tooko lapa eyaka waameteko kilikoa meeloganeya.

⁴⁰ Nitikale one oyali-kiti-pala okome okome edekolo piti motiki-pe. Kipa nooke wene tugamekete pitipa motiki-pe wa okale

⁴¹ piti tube mati motaneyatokome kini kini oote tekete ekete pupulege ue minetameka

oneme okole-kamadopa i tokono, Yesupa edoa ali kakome tokoto patu wa kā oa kakeneya.

5

Yesuyo Ipono Ti Awikolokaneya

Meane Ago Epetekanemo

(Matiu 8:28-34, Luke 8:26-39)

¹ Yesu one oya-lawe-pala ue dipike eni mea pote Galili ue mine eka matanuke Gerasa yatenane take witapaneya.

² Witapekome ue dipike mea matanuke katepi-toa pome ka ludu yakaka poane ipono awitane ago pade one kotua nekeneya. Einagopa tuane ali atoa oloyo toai taneka kawa nekeneya.

³ Einago tuane yene oloyo toai taneka yakene agopa padameka deko moa kawikamele toameneya. Kapa poomeka lutua kawikamele toameneya.

⁴ Kawikoa enekolika kapa tepomekakakoi kugutukoa tadekatapea pitoa pome ni kapa poo kakakoi kekolokoa pitoa pokala taneya.

⁵ Likonu loyoka eni ta luduka tono tono wanekeka yakome kā oa tigini-pala aloame kobo taneya.

⁶ Nitima yawa kawapa padepete padeka mati kakome enekale Yesu nome kakale enekome one kakata teyapea nome wadini tukupia mekome

⁷ kā telo okome okome ako odene meko Akolaline mana Yesu nepa edade noka-pe. Akolaliyo yakakoane ukuno, no tete meamoano wa-ye wa kowitaneya.

⁸ Nimo wa kowitikomema Yesuyo poane ipono ne winago takoa pa wa okale tokome ni akeneya.

⁹ Nimo okale yatekome okome neke ibini te-pe wa okale okome i agoke toto peya mati awinote mekoya tokome ibinipa ipono ti wa ootokoa

¹⁰ kowitikome okome toto i ta wawa padeka poe wa moa wetekamea wa kowitzakanya.

¹¹ Nipete einakeya liti tono kebonoke kai peya mati kimi ke noa kakeneya.

¹² Nitikoli tokome ipono-kitame Yesu kowitikete ekete toto kunuka kunu kai-kitike awiponoono, moa wetekoa ta wa kowitzakanya.

¹³ Nipa poe wa Yesuyo okale takoa pootapekete e kai-kitike awipananya. Nitikoli einaka eina kai tono payaneke kawa palake ketipea kikilikoa pote atukolokapananya. Nipa ege egeta kadukoa (2,000) tadiya kai ue nakoa tukolokapananya.

¹⁴ Nitikoile enekete kai egetane yene toomoa pote ali atoa ta latia pitikoikaka tayo yaru luduka eni tanemo oa pupitikama pekeneya. Nitikoli yatekete edele taneyake ikiti patu wa enadete nekeneya.

¹⁵ Yesu kakata eni note enekoli ipono ti awitananya yakanakago wene kiyo akananya mea pue wa moa kakeneya meadeka. Nitanyea mekale enekete ekee wa piti tokale kakoli

¹⁶ eida kakete enile tokale enekoi yename ete dika dika wa ipono awitananya meane ago-pala tanemo oa ni kai-kiti-pala tanemoka i i wa toawea akenyela.

¹⁷ Nitaneyake e yename i take meameneya, wete pade take poano pa wa Yesu kowitzakanya.

¹⁸ Nitikoli eni ta tewitikoa ue dipike peapetekoa poademe kakaka ipono awitananya

yakanakagome okome nepala odene kata yatono
pato wa Yesu kowitikale okome

¹⁹ nitamatono, neke take ali atoa mekika poke
mepamene. Nipa no Ali Munoyo ne ela motekene
epetekakoumo neke ali atoa tōawea oma poano
pa wa akeneya.

²⁰ Nitaneyake Dekapolise ta ludu yakome
Yesuyo one epetekakanakamo i i wa tōawea oma
yakale yatekete peyame ekee wa wene kainya
pianeya kakete kā oa kakeneya.

Yesuyo Dairasine Konakoma Kamotokoa

Mamina Nami Mitikane Atoa Epetekanemo (Matiu 9:18-26, Luke 8:40-56)

²¹ Yesu ue dipike wa peapetekoa pome mea eka
matanuke wakapea pekeneya. Wakapea pome
katepitoa kakale ali atoa peya mati one mekata
kouko a note kakeneya.

²² Nitoa kakoika losu yapu talo tane ago padé
Dairasi wa ibini akene ago nome Yesu enekome
one kawane witipitoa kowitikome okome

²³ anu konakoma pene tuademe toko. One latoa
yamotonu, tuoukome pikota ne noke yono pia
epetekakoano ta-kale okome

²⁴ nitouno patoe wa einago-pala opia pekeneya.
Opia poademe pokaka ali atoa lewi lewita pia note
apua takama nekeneya.

²⁵⁻²⁶ Eni ali atoa pakeke eya atoa mali
tuku kakoa (12) ponoka toa kamate yokoa
kakome yeneme tuaneya meane atoa litima
nekeneya. Einatoa papete dokosa ali-kiti
mekoika epetekamotoa pokala taneyake kee-
kama enekakale meaneya. Latekamotoa pokala

taneyake epetekamele toamokale one kue peya takoa wetekaneyake pa ete toa yene tube toma pekeneya.

²⁷ Nitane atoame Yesu toma yakenemo kugu yakaneya tokome einali atoa pake pake Yesuno mukiti lono lekama nome one tokoo kakene mamina nami mitikananeya.

²⁸ Nipa i agono kakene mamina namido mitikakenepa latoane pou wa wene pikome taneya.

²⁹ Nitoa nome mitikakale eina eina one kamate pegetoa yotokana toa yoameneya kakome eina teigome tadeko wa wene taneya.

³⁰ Nitikale Yesuyo one tele padeke weamu-tukome tadekono wene tokome eina eina kutu peketapekome ali atoane kabeta pake pitikoa okome okome noanu teyo mitikakato-pe-kale

³¹ one oya-laweme ekete ali atoa apua takoa ne unukamoaa mitikakoa tikino, edekolo oko-pe wa okoli

³² one mitikanane tuku toa enademe enapemu taneya.

³³ Nitikale einakatoa one epetekakana wene tokome pitime kolu kolu nokale Yesu kakata nokome kawane witipitakome one-pala tokanakamo toawea akeneya.

³⁴ Enimo okale Yesuyo okome anu kono nooke wini wene tugake tokoleme ne latekakolo uku. Neke tepe kolotini kilikoa pimotono pa. Neke tane yene teiganeya poano pa wa Yesuyo akeneya.

³⁵ Nimo oa kakaka tobou agono yapu pitikoi yene pade-mene nekete ekete neke konopa tukome tukano, mone i Tikisa ago polipo takakoa kawamea wa onaneya.

³⁶ Nimo omotoake Yesuyo losu yapu talo tane ago-pala okome okome no i agome neke kono oyake latekamele toko wa piti toameneya meamene wa oomotokome

³⁷ Pita Yameta Yamene wamene ago Yone toa koua pomepa ete yene noameo wa kini-mene pekeneya.

³⁸ Losu yapu talo tane agono yapu eni koua pokome enekale ali atoa ete palo oto palo toa kakete komo kāta pitikoa kakoli enoa yakaneya.

³⁹ Nititikoa yapu tuapea pokome okome dekolo kale kene natekoa komo kā pitikoa kaki-pe. I akoma tukome tuaneyea menano, pa atu pia meko wa akeneya.

⁴⁰ Nimo okale yatekete e ali atoame one yau takakoli kiwi peya akolono poe wa wia littapeneya. Nititikoa etene ninetaka one koua nokana ali-meneka patono noe wa einakoma yene taneya piane yapu luku pekeneya.

⁴¹ Nitoa pokome akoma-pala okome okome Talisa kumi. Enipa tone agalekepa i akoma deya yakoa wete kamoa wane uku wa okome akeneya.

⁴² Nimo oka oka kamokoa yakeneya. Mali tuku kakoa (12) penane akomapa Yesuyo eni kamotokaneya. Yesuyo enile tokale enekete one-pala kakene yename ekee wa kā oa kakeneya.

⁴³ Nitikoli okome anume tukumo ali atoa enekete natemoka toawea wameamene. I akoma nee moa lawetoe wa Yesuyo akeneya.

6

*Nasarese Yename Yesu Akoawakenemo
(Matiu 13:53-58, Luke 4:16-30)*

¹ Yesuyo einakoma latekamotokome one pine take wakapea pome mepaney. Koua pato wa one oyali-kitika pote mepaney.

² Eidapa ko mea pupu toamene-pete Yesu losu yapu pome Akolalinemo olaukoa kakeneya. One eni olaukoa kakome okamo yatekoi-kiti peya matiyame kā oa kakete ekete i agopa teyo olaukaneya-pe. Edane peku nootokoa okoto patu. Namolo enamokoonakale padele padele telekole i agome i toko.

³ Beita, i agopa pa kodou ago. One nine Maria i mea one wamene-mikiti Yame Yosi Yudase Saimone einago-mene i mea tiki. One laine-mikitika tone i take meki wa one-pala wene pokete paya tetepo takoa wakeneya.

⁴ Nitikoli okome Akolaline agale toawea akak-agopa ete yename kei pimotoake one ta pine yenameka one kako yenameka one yapu pitiki yenameka paya tetepo takoa wakala tiki wa Yesuyo akeneya.

⁵ Nitaneyake eni take mekome padele tubele tamele toameney. Nilepa tamele toameneyake yene tane ali atoa yono pia latekakilepa pa natetekoa latekaney.

⁶ One take yene oneke wene tugameney mekoileke Yesu wene kainya pianey meaney.

Yesuyo One Oyali-kiti Ta Padeka Padeka

*Moa Wetekanemo
(Matiu 10:5-15, Luke 9:1-6)*

Yesuyo one eni ta tewitikoa pome ali atoa pitikoika yakome Akolalinemo olaukama yakeneya.

⁷ Nitoapa one oyali-kiti tuku kakoa (12) one kakuta koukoa noe wa kayo oa mootokoapa einapete titimoa takuta takuta wa moa padeka padeka wetekakome eya wa akeneya. Noanu tele patu kautakoa kama yakete ali atoake awitane poane ipono takoa wetekakala tamene.

⁸ Nitima yaketepa palawe wane aua poamoa ka ua poamoa kue lene ua poamoa pa poatino poe.

⁹ Enika eniya aua poameketekete iti toua moa kawa yene mekhoa tamene. Tigini kawatiki maminna takuta aua poamoa odene kawatoa pamene.

¹⁰ Nitoa pima yawa pade take pote meketepa yapu yapu yawameneya odene yapu-kama mea kawa pokala tamene.

¹¹ Wa pade yapu pitikoi ali atoame kini yapu noatino noe wa makutukoa moamoa kini agaleka yakoa moamoa tokolipa kini eni yapu tewitikoa pekete kini kawake kakene kege koketikoa pamene. Akolaliyo kiwi kibu moateko adeka pia nitamene wa Yesuyo akeneya.

¹² Nimo okale e ali-kiti pote ali atoa kini namolole tewitikoa wawe wa mo wima pekeneya.

¹³ Nitima pekete ali atoake awitane ipono takoa wetekoa eya kuya yene tane ali atoa kainya matike peto peko latekhoa taneya.

Ali Atoa Ue Motokama Yakene Yone

Kabe Teiganemo

(Matiu 14:1-12, Luke 9:7-9)

¹⁴ Yesuyo toma yakenemo ali atoame otoka otoka tokoomo kugu Erodeyoka yakaneya. Padekitame ekete ali atoa ue motokama yakanakago

Yone tuaneyake wa kamo a nomepa nipa tubele mati toateko tele eni luaneya yakome toko wa oa

¹⁵ wa pade-kitame ekete e'e, mena. I agopa Ilaida wa oa wa pade-kitame ekete i agopa Akola-line agale papete toawea akane ago tetepo takoa meko wa oa taneya.

¹⁶ Yesuyo toma yakenemo kugu eni yatekome Erodeyo okome ekee, ali atoa ue motokama yakanakago Yonepa kabe teigoa tukamotoane tokounake wa kamo a nokome toko wa akeneya.

¹⁷ Namolo Erodeyopa one poyo ali-kitame Yone deko a moa kapa po kakoa po yapu pitikamota tikilepa eya atoa Erodiasine wene epetekademe taneya. Nipa Yoneyo eya tokale tokome taneya. Erodeyo one kale atoa wamenago Pilipi natono Erodiasi one motaneyake

¹⁸ Yoneyo Erode mekata nokala tokome okome neke kale atoa kode motekepa toto Yu yenane kekanele wini toka wa lugutukoa kikoa okala taneya.

¹⁹ Nitikale Erodiasi einatoa Yone-pala timini nakale mekome wia tukamotadiya wa wene pikake enapete pade nitamele toameneya.

²⁰ Nipa Erodeyo Yone wia tukamene piti tokale mekome mama moa yopikale tokome nitamele toameneya. Erodeyopa Yone einago epetanele-kama toa wene kiyo akeneya mea toko ago wa wene taneya. Eni wene tokome mama moa yopikome one agalepa yakada wa one mekuta ne noo wa motokome yakoai taneya. Nitoa yatekome wene kainya mati pianeya meake wedia yakakoa meaneya.

²¹ Nitaneyake Erodiasiyo Yone wia tukatekale

pa nepikoa meaneya. Nitoamekakoa Erodeyopa one opiane oi ponokale eya taneya. Oneke timini kakoa yakene yeneka one tobou poyo alikitika Galili take ibini akene ali-kitika kini toge kikakakuno toge nee natono noe wa agale oa wetekakale nekeneya.

²² Kini note koukoa mekoita Erodiasine kono nome tiabu toa kakale Erodeyoka one togeke nekene yenameka ke wa wedia meaneya.

²³ Erodeyo ke wa wedikome okome agetai tja, anukuya-kiti pade memotono wenedo pikepa nipa iya mano wa oano ta. Anume yopiku ta kounale oto pia yamea wa okaleka oto piane yameou wa Erodeyo okale

²⁴ akolono nine kakata pokome okome aua edeya mano wane ou-pe wa yatekale niname okome poke imo akapa. Ali atoa ue motokama yakanakago Yone kabe teigoa one wago wane okolo kagonoke pia oto memotoa toano ta wa akoano pa wa niname oa wetekaneya.

²⁵ Nimo okale teyapea Erode mekata pokome okome ali atoa ue motokama yakanakago Yone kabe teigoa wago wane moa okolo kagonoke pia oto memotoa toano ta wa akaneya.

²⁶ Nimo okale yatekome Erode elapa tube mati toa kakeneya. Nitikomeke one namolona etene tja wa okana agale tetekakomepa one-pala opia mekete toge nee nakoi yenane wene potokamedekale eya taneya.

²⁷ One poyo ago pade moa wetekakome okome Yone kabe teigoa wago wane aua notokoano pa wa moa wetekaneya.

²⁸ Nitikale pome Yone po yapu pitikata kabe

teigoa one wago wane okolo kagonoke pia aua nome eina tuatoa metekaneya. Nitikale moa ni-nane aua potokaneya.

²⁹ Nitaneyake Yonene totono yakoa one opia yakene yename Yone kabe teiganeya wa okoimo yatekete Yonene tigini monote aua pote kota keneke pipaneyea.

Ege Egeta Kadukoa (5,000) Ali Atoa

Nee Lawetanemo

(Matiu 14:13-21, Luke 9:10-17, Yone 6:1-14)

³⁰ Yesuno oyali-kiti Yesu kakata oto wa wakapea note kini padele padele toma pokoinakamoka agale olaukama pokoinakamoka i i wa oa mekala taneya.

³¹ Nitikoli okome opi kini pupu ko meatino, ali piامene take patono noe wa akeneya. Nipa kini mekoita ali atoa nekete pekete toa kakoli kini nee toa noatekoile toamokale tokome ni akeneya.

³² Nitoapa ue dipike peapeteko pote ali piامene take mea pote witapeneyea.

³³ Nitoa pokoli ali atoa kainya matiyame enekete ekete kunu pikipa Yesu one oya-mikitipala pokola wa kini kini tubeya take pitikoika kawa one pome witatekata ka ludu pote teigoa kapaneya.

³⁴ Teigoa kakakoa Yesu ue dipi mea nome katepitoa kakome enekale einali atoa eida oboa kakedekoi. Einali atoa enekome okome i ali atoa talo tokago kawamokono, egetamene sipi sipi kai keneya meki wa ela motokome pademo pademo oa olaukoa kakeneya.

35 Ta pene lima lima tokaka one kakata one oya-miki nekete ekete ipa ali piamene taano,

36 ta-pala lima nokono, ali atoa ta latia pitikika tayo yapu luduka i yene kini noatiki nee topo toa mopamene wa oa wetekoa ta-koli okome

37 kini noatiki neepa kime motokoa lawetamene-kale ekete neme edemo wa oko-pe. Ege kadukaka kapidi kakoa-peta kadukoa (1,000) kina kueme kini nee motokapote oto wa lawetemota oko-pe wa akeneya.

38 Nimo okoli okome kini palawe wane edela piko patuno, enepoe wa okale pote enoa wakapea nekete ekete palawe ko kakoa-pala (5) de mou yomo deya takuta toa piko-koli okome

39-40 i ali atoa kiwi peya poma ludu tutu tutu wa payapono pia kilikoa meetapeo wa okale padeka-kiti ege odepeta kadukoa (50) padeya payapono pia mekala toa wa padeka-kiti ege takupeta kadukoa (100) padeya payapono pia mekala taneya.

41 Nitikoli Yesuyo palawe wane ko kakoa (5)-pala de mou yomo takuta toa moa pikoa kakome ate tibuke nepikakome ke wa Akolali-pala ootoko popimotokome one oya-miki metekome okome tatikapoatino poe wa mekala taneya. Wa eina toa de mou yomo takuta popimotokome mekala tokale moomotekete tatika tatika topokoli

42 peyame moa noa tagataapea kitipu meaneya.

43 Nootakaneyake palawe mou kugu paka pitanya wekotoa moa ua ka katika tuku kakoa (12) mako puputua moa pianeya.

44 Eni palawe nakoina-kiti ali-kama takoa oi motikilepa ege egeta kadukoa (5,000) nakedekoi.

*Yesu Ue Tali Ludu Yakenemo
(Matiu 14:22-33, Yone 6:15-21)*

⁴⁵ Yesuyo e yene lawetetekoa kakome one oya-miki-pala okome okome ue dipike peapetekoa pote eka matanuke Besaida take kiwi namolo takoa mepoatino poe. I ali atoa kini kini pitikika pipoatino poe wane wetekamotekene nouno, patepoe wa one oyali-kiti wetekaneya.

⁴⁶ E oboa kakoi yene pipoatino poe wa wetekatekoapa Akolali kowitademe tono tobouke lewia pome mepaneyea.

⁴⁷ Ta likaka Yesuno oyali-kiti ue dipike mea muke pekete kakoli Yesu matanuke kidene kakeneuya.

⁴⁸ Nitoa kakome enekale pupulegeme ue dipi kiwi nokoina lono kutu wa popokoa aua poademe tokoa kakale enaneyea. Pa nitikoa kakale ta patademe tuei teigaka Yesu ue tali ludu kautoa nekeneya.

⁴⁹ Nitoa nome patukademe ponokale eneketepa ipono nokono wene pikete ka oa kakeneya.

⁵⁰ Nipa peyame one nokale enekete tekete piti mati motekete akeneya. Nitoa ka oa kakoika okome no i nukuno, tepe kolotini kilikoa pimotonu piti moameo wa ootokoa

⁵¹ ue dipike pome kipala opia meaneya. Pome mekale pupulege teitatapeka. Nitikale enekete one oya-mikitame ekee wa wene kainya pianeya meaneya.

⁵² Nipa Yesuyo palawe wane moa tokanakale enoake ile tokanakago wa wene toamekete taneya.

Genesarese Take Yene Pitikoi-kiti

*Yesuyo Epetekanemo
(Matiu 14:34-36)*

⁵³ Ue mine eka matanuke witapote Genesarese take katepitoa kakete ue dipike po kakoa yomoke kebeteloganeya.

⁵⁴⁻⁵⁵ Nitaneyake eni take yename enakago eni noko wa eni ta ludu yekeika yukukata teyapea oawineya pekete kini yene taneya pikoi-kiti leyo leyo toa one meko wa okoita-kama aua nokala taneya.

⁵⁶ Nipa Yesu ali atoa pitikoika de takeka tube takeka tayo yapu luduka yakaka kini yene tane ali atoa makesike-kama piponokala taneya. Nitikete ekete i yene tane-kitame neke mamina nami mitikatekamotono ta wa kowitikala taneya. Nitikoli one mitikatekakoi peya latoa pokala taneya.

7

Yu Yenane Kaua-mikitame Kekaneya

*Latikama Nekenemo
(Matiu 15:1-9)*

¹ Padepete Parisi ali-kitika Mosesene totono pine toa olaukane ali-kitika Yerusalem ta kawa note Yesu kakata oboa kananeya.

² Oboa kakete enekoli Yesuno oya-lawe padeka-kihi kini yono abe koameneya mekete nee nakedekoi. Nipa kini kekanele eni tadekoi.

³ Parisi yenameka ete Yu yene peyameka kini kaua-mikitame toma nekenele tekete kini yono abe koootokoa nee moa naki. Pa moa nakiya mena.

⁴ Nipa makesi kawa yapu note nee moa noad-etepa kiwike kewenoko poanele eni koguna wa

yono abe namolo takoa kogala tiki. Kini kapoka
nee yoatiki meteka kapame latiane okoloka abe
ko'a enile tokala tiki. Kini kekanele takaya
kekateko'a nitikala tiki.

⁵ Nitikiya tokome Parisi ali-kitameka Mosesene
totono pine to'a olaukane ali-kitameka Yesu
yatekete ekete neke oyali-kiti kini yono abe
ko'amene ya nee pa moa nakipa tone kaua-
mikitame kekaneya latikanele tekete tikino,
edekolo tikiti-pe-koli okome

⁶ wene takuta pianeya meki yene kini eni
toatekoilekepa Aisaiayo papete eya wa wia
mekapianeya.

*I toaweane uku ali-kiti kini kabunume no kei
pikilepa kini tepene paya wene pianeya
meketeke tiki.*

⁷ Nitikino, kini kowitikoimopa edoane yakamotoa-
pe. Kini kaua-mikitame titia olaukanele ile tamene
ile tamene wa olaukama pikino, yakamou-li wa
Akolaliyo wene takane toa Aisaiayo papete wia
mekapianeya.

⁸ Ae, Akolaliyo tamene wa akenemo ete pimotoa
wakete kini kaua-mikitame titia olaukanele litia
tiki.

⁹ Nipa kini kaua-mikitame titia tanele litia
toadetepa Akolaliyo tamene wa akenele wakete
onekele pa lede takama yaki.

¹⁰ Moseseyo papete eya wa akeneya. Neketai
nekquata kei pia mape moamene. Panagome ni-
tamene ya etene nineta ahoa tekalepa einago moa
wia tukamene wa Moseseyo akeneya. Nimo wapa
akeneyake kime eya wa iki.

¹¹ Panagome-kiti one etene nineta-pala okome okome ae, agetai agauata kita ada atue deyata mekiyake kita auapeane padeya meatekuyapa kobane latikakouya tekene meamele toamoko. (Kobane latikaku wa tone agaleke eketepa nipa Akolaline pikaku wa ekete oko.)

¹² Einagome nimo ootokoake naniko einakeya etene nineta meou wa meademe tokale kime ekete kobane latikakanano, meamea wa iki.

¹³ Nipa Akolaline agale ete pimota wawa kini kaua-mikitame toma nekenele litikete ile tamene ile tamene wa olaukoa enile pale tokala tiki wa Yesuyo akeneya.

*Ali Atoa Wene Moa Koiganeleke Akenemo
(Matiu 15:10-20)*

¹⁴ Yesuyo eida oboa kakoi yene one kakuta noe wa kayo oa motokome okome kipala i ukumo wedoa yakoa moamene.

¹⁵ Kimane keneke aka ketipea moa nokotikako neemepa pinali one wene oyake moa koigamele toamoko. Nitamele toamokoyake pinali one te-pene meaneya poane wene atepea kabunuuke witako agalemepa pinali one wa moa koigamele toko.

¹⁶ (Yakou wa kale piiyakoa meki-kiti kime yakoati wane uku wa Yesuyo akeneya.)

¹⁷ Nimo oomotokome yapu pome mepokale one oyali-kiti nekete ekete neke ina pedoa okana agalepa pine edoa pikoto-pe wa yakanokoli okome

¹⁸ ae, ete ali atoame wene toamokino, opika kime wene toamekete iki-pe. Panago one kimane

keneke aka ketipea noa nokotikako neemepa pinali one wene oyake moa koigamele toamoko.

¹⁹ Nee eya moa nakolopa einagono kimane keneke pome tepene ponome me me toa wa te pu latia patukatapekala toko. Nitikome tokono, one weneke patukoa koigamele toamoko wa Yesuyo akeneya. (Nipa eya kuya nee peya Akolaliyo ali atoame nomotoa-kama latia pikaneyano, odeneyaka kekaneya latikakile toameamene wa okome akeneya.)

²⁰ Nimo ootokoa kakome okome e ku poane wene tepene meaneya yawa kabunu witakolemepa pinali one wene moa koigakoya.

²¹ Nipa tepene meaneya yawa witako toa tokome pamoko mea ni panagoneya kode moa ni ali wia tukoa ni mone padane atoa lia

²² ni eya kuya tepi moa ni ele kule kojanele toa ni ali atoa oa yotokoa ni abeyale toa ni mone panagoneya poi moa ni ete ali atoa-pala akoa agale oa ni ete yene paya tetepo takoa ni ele kule pale toa

²³ enika enilepa aline tepene meaneya yawa witako toa pine yene kiwi moa koigamele toko wa Yesuyo akeneya.

*Yesuke Wene Tugoa Meane Atoame Tanemo
(Matiu 15:21-28)*

²⁴ Yesuyo enimo oomotokome Taia ta liti piane take pekeneya. Nitoapa panagono yapu eida pone paigakoane meouno wene pianeyake oyake nita-mele toameneya.

²⁵ Yapu pomemekaka eina eina atoa padame Yesu nome meko wa okoimo yakoa nome one

kawane witipitaneya. One konakoma deyake ipono awitaneya tokale ni nekeneya.

²⁶ Einatoapa Geriki yatene atoa Sairoponisia take opianeya. Nitane atoame Yesu kowitikome okome anu konoke awitane ipono neme takoa wetekakoa ta-kale

²⁷ Yesuyo pedoa agale ete okome okome nee eya nako-pete-kama mati-kiti namolo takoa nee lawetamedeko. Mati-kitane nee tatia wa padeya tue tine-kiti kakoita pitikakopa nipa pokon wa Yesuyo akeneya.

²⁸ Nimo okaleka wa ete einatoame agale topo takakome okome winimopa nimini okoyake matikitame moa noa kugu pikapa nee naki walai keneke tue tine-kiti kakoita pitakale tue tine namele toko wa okale okome

²⁹ neke wini okomoke eya wane uku. Neke konakomake awitane ipono wete takoa pokome tokano, pa wa wetekaneya.

³⁰ Nitikale one wakapea pokome enekale one akoma walai waneke kilikoa kawia pikale enaneyea. Oneke awitane ipono takoa pekedeka.

Yesuyo Kale Kene Keteaneyaya Agale

Amele Toameneyaya Meane Ago Epetekanemo

³¹ Yesu Taia ta tewitikoa Galili ue mine wakapea poademe pokomepa Saidone Dekapolisi tata patukoa pekeneya.

³² Nitaneyake pade ali-kitame kale kene ketea agale liyo liyo pitane ago Yesu kakata aua nekete ekete i ago yono pia epetekakoano ta wa kowitinokoli

³³ einago moa ali atoa kakoita wawa one kidene eko awa pekeneya. Nitikome einagono kale kene yono pitikoa tekelipu tootokoa einagono keke mitikakatekaneya.

³⁴ Nitoapa tibu ate enekakome kenemada ootapekome okome Epasa wa akeneya. Epasa wapa wete peetapea wa okome akeneya.

³⁵ Yesuyo Epasa wa okale eina eina einagono kale kene peetapea keke epetekoa tokome one agale yapetekoa witoa akeneya.

³⁶ Nitikale Yesuyo e yene-pala okome ete ali atoa kotukete anume i tukumo toawea ikileka toameamene wa akeneya. Toawea ikileka toameamene wa okala taneyake one eni tanemo oa pupitikama yakeneya.

³⁷ Nipa wene kainya mati pianeya kakete ekete i agome ele kule tikilepa epetanele-kama toko. Kale kene keteaneyaya meane-kiti epetekakolo agale yakoa ni agale amele toameneyaya meane-kiti epetekakolo agale oa tiki wa kā oa kakeneya.

8

Ege Egeta Kadukoa (4,000) Ali Atoa

*Nee Lawetanemo
(Matiu 15:32-39)*

¹ Enipete-mene ali atoa peya mati Yesu kakata wa obomoa note kananeya. Kini nee noatekoiya toamokale enekome Yesuyo one oyali-kiti one kakuta noe wa kayo oa motokome okome

² i oboa kaki ali atoa mama moane ela motekene uku. Ta tebolo pataka toa no-pala opia yakete kini noatiki nee peya takatekaoa pa kaki.

³ Padeka-kiti ta tetemada pia note kaki. Nee noameneya kini kini yapu tadoa poatino poe wanedo wetekakolupa yapu poadete pokoi ka pake kobume tukete witipitoino wetekamele toamoko-kale

⁴ one oyali-kitame ete Yesu-pala agale topo takoa yatekete ekete ipa ali piamene taano, kini noatiki nee edoa motokoa lawetemotoa-pe wa okoli okome

⁵ ni kini palawe wane-kiti edela piko-pe-kale ekete tatono kakoa (7) odene piko wa okoli

⁶ i poma ludu meetapeo wa e ali atoa mekat-apeneya. Nititikoapa tatono kakoa (7) palawe wane moa pikoa kakome Akolali-pala ke wa ootokoa popimotokome one oyali-kiti metekome okome i ali atoa tatikapoe wa mekala taneya. Nitikale mootokoa e ali atoa mekoi toa nee pikama yakeneya.

⁷ De mou-meneka moa eina toa Akolali ke wa ootokoa popimotokome metekome okome i mouka tatikapoe wa okale

⁸ pikama yakoli noa tagataapea kitipu meaneya. Nitaneyake nee kugu pika wekotoa moa ka katika tatono kakoa (7) mako puputumoa pianeya.

⁹ Eni nee nakene-kiti oi motokolipa ege egeta kadukoa (4,000) tadiya nakedekoi.

¹⁰ Eni ali atoa kini kini yapu yapu tadoa poatino poe wa wetekateko a one oyali-kiti-pala ue dipike wete eni peapetekoa pome mea Dalamanusa take witoa pekeneya.

Tibuke Padele Tubele Witakamotonu Ta Wa

*Parisi Yename Yesu Likoa Enanemo
(Matiu 16:1-4)*

11 Einapete Parisi yene padeka-kiti Yesu kakata note one-pala agale ete oto topo takoa oa kakete ekete neke toma yakole Akolaline tele patu kautakoa kake tadekalepa nipa a tibuke padele telekole witakamotono ta wa likoa enaneyea.

12 Nitikoli tepe we tokale kakome okome ae, ipete meki yene kimepa no neke tokolepa Akolaline tele patu kautakoa kake tadekalepa nipa padele tubele yamea ta wa ikipa edekolo likoa eneki-pe. Enile pade yameamou wa oomotokome

13 e yene tewitikoa pome ue dipike wa peapetekoa pome mea eka matanuke witoa pekeneya.

Parisi Yene Erode Kini Yisi Kugu Kiwike

Weamutukaya Kekateko Yamene Wa Akenemo (Matiu 16:5-12)

14 Yesu eni mea pokaka one oyali-kitame palawe wane-kitipa wene kayapea ua noameneya tuku toa kakoli odene wane piadeka.

15 Nitadekale Yesuyo one oya-lawe pubu okome okome Parisi ali-kitika Erode einagoka kini yisi kugu kiwike weamuoono, wedoa yamene wa kale

16 kini kini yakate tekete ekete tone noateko palawe wane-kiti wene kayapea ua noamokoon-ake ni okome oko wa akeneya.

17 Nitikoli kini tepene piane wene tetoa enekome okome kini palawe wane ua noamokoinakepa edekolo oa kaki-pe. Anume tokoule enetekoake wene toamekete iki-pe. Kini kolotini lupi tootokaneya meki-pe.

¹⁸ Kini lene kamotoake anu tokoule enoa moamokoi-pe. Kini kale kene kamotoake anu okoumo yakoa moamokoi-pe. Nipa anume tokolu kime enekoinakale wene kayapetapea mekete iki-pe. Nipa eya tokouna.

¹⁹ Palawe wane ko (5) kakoane moane ali atoa ege egeta kadukoane (5,000) lawetekolu nootokaneyake kugu pika wekotoa moapa ka katika edela mako puputumoa pikoi-pe-kale ekete ka katika tuku (12) kakoa mako puputua pikoo-koli okome

²⁰ ni pade-petenaka palawe wane tatono (7) kakoane moane lawetekolu ege egeta kadukoa (4,000) ali atoame nootokaneyake kugu pika wekotoa moapa ka katika edela mako puputumoa pikoi-pe-kale ekete ka katika tatono (7) kakoa mako puputua pikoo-koli okome

²¹ eina tokoule enetekoake wene toamekete iki-pe. Eina tokouna toane wa tamele tokolomekene tukutumo wa Yesuyo akeneya.

Besaida Take Leneta Lianeya

Meane Ago Epetekanemo

²² Yesuyo Besaida take pato wa one oyali-kitipala pome mepaneya. Nitikale pade yenameleneta lianeya meane ago oneke aua note kowitzikakete ekete i agopa yoname mitikatekoano takoli

²³ Yesuyo pata wa einago yono moomotokome eni ta kago ketepono patukoa akolono pekeneya. Nitoapa one leneta tekelipu takatekoaoa yono pikome okome padeya eneko-pe-kale

²⁴ ate enekakome okome ali-kiti enekilepa tukuyake yomo-kiti yakene tetepo toko wa akeneya.

²⁵ Nimo okale einagono lene yono wa pikale wedoa nepikoa pikale one leneta epetekatapekale padaya padaya peya keleyo pikolokakale enaneya.

²⁶ Nitikale Yesuyo okome winika wini ali atoa pitikika poameneyea neke yapu patukake poano pa wa oa wetekaneya.

*Yesu Nepa Keraisu Wa Pitayo Akenemo
(Matiu 16:13-20, Luke 9:18-21)*

²⁷ Sisaria Pilipai take pato wa Yesu one oyalaweh-pala eni take ali atoa pitikoika poademe pokome okome ali atoame no te kakulu okala tikiti-pe wa yatekale ekete

²⁸ ali atoa padeka-kitame ne i agopa ue motokama yakanakago Yone wa oa ni pade-kitame ekete ne i agopa Ilaida wa oa ni pade-kitame ekete ne i agopa Akolaline agale toawea akako ago pade wa oa tiki-koli okome

²⁹ nimo wapa akedikiyake anu oya-lawe kime no te kaku wa iki-pe-kale Pitayo ete topo takakome okome nepa Keraisu wa papete takoa kakapiane ago wa okale okome

³⁰ no Yesupa Keraisu taatekoane nekedeku wa ali atoa kotukete etene toawea ikileka toameamene wa oa tukaneya.

*Yesuyo One Tete Moa Tuatекамоke Akenemo
(Matiu 16:21-28, Luke 9:22-27)*

³¹ Nitoapa Yesuyo one tuatекамо i i wa enipete titimoa toawea okome okome no Ali Yatenane

Oyagome tete-kala moane kawou. Nipa Kanosolo ali-kiti ni Akolalike lodo yotokoai tiki tobou ali-kiti ni Mosesene totono pine tøa olaukaki ali-kiti enika eni ali-kitame no kote tokale wawa wia tukoi. Nitikolika ta tebolo takoa pataka-pete kamoane pou wa Yesuyo akeneya. Nipa keleyo toawea akeneya.

³² Nimo okale Pitayo pata wa Yesu-pala eko keneya aua pome kakome kikoa okale

³³ Yesu kutu peketapekome o yene enekome okome i ago Setanu ne anu mukiti lono kuka ponoke kapono, winipa Akolaline wene piko toa wamoa, pa aline wene piko toa okono, wa wa kikoa akeneya.

³⁴ Nimo ootokoa kakome one oya-lawe e oboa kakene yene peya one kakuta noe wa kayo oa motokome okome no i ago litima nou wa wene pikagopa nekele tewitikoa wamene. Nipa ne wia dekatiki yomo-pala aua nou toa keneya tete mokoa kakeka no litima namene.

³⁵ Kepene mama motokome tukaya wa piti motoko agopa etepea tua atua poo. One kepene mama moamokome Akolaline epetane agale-pala no i agotake oyake tuou wa wene pikagopa toa motaneyea mea kama poo.

³⁶ Panagome-kiti one yomini atukome atumotoake itonoke pia kawa tokoya peya mootapead-ekalepa edeya weike moamoo.

³⁷ One yominido atukome atukalepa edeyame oto wa topo toa momotoa-pe.

³⁸ No kaku-pete meki yene Akolalinele takamoia poanele toa mekino, kiwi panagome no-pala anu agaleta ya motokome wakalepa no Ali Yatenane Oyagome einagoka ya motekene wawou. Nipa

Agetai pa teleta tootapeneya meko toane meane one wene kiyo akeneya meki edelo ali-kiti-pala odeneka wakapeane nekene nitou wa Yesuyo akeneya.

9

¹ Yesuyo nimo ootokoa kakome okome etene nimini ukuno yakoe. Ita kaki yene kiwi padeka-
kiti wete tuameneyake Akolaliyo ali atoa pawe toa
talo tokome padele telekole tokale enoi wa Yesuyo
akeneya.

Tono Tobou Waneke Yesu Pa Tootapeneya

Kakenemo

(Matiu 17:1-13, Luke 9:28-36)

² Ko melepu kakoa (6) ta patatekaneyake Yesuyo Pita Yameta Yone toa kidene-mene ete witimoa aua pome tono kakene matike lewia pome kapaneya. Nitoapa o ali-mene kakaoa one lene timini yono eya yati yati tootapeneya kakeneya. One kakene mamina-pala yati yati toa ake tootapeneya.

³ One eni mamina ake tootapene toapa padameka mamina abe koaka edikoa ake takamele toameneya.

⁴ Nitaneyaka kaka Ilaida Moseseta aida kotikat-apea nekete Yesu-pala ko oa kakeneya.

⁵ Nitikoli enekome Pitayo okome Tikisa ago kimene ko oa kakita toto-meneka odeneya kakono, ke wa oko. Neme nitika wa okalepa aga yapu tebolo Moses Ilaidata kini tutu tutu wa wikakoo wa akeneya.

6 Nipa one oateka agopa tokale tokome pamo eni akeneya. Nipa Yesuno oyali-mene piti tubeya tokale tokome akeneya.

7 Nimo oa kakaka wedome agopa takoa kauma nekeneya. Nitikaka eni wedo keneke agale ludu nokome okome anu mana anu kolotini ago wini kakono, one oka toa yakoa tamene wa akeneya.

8 Nimo okaka wete enetapekoli eina kakoinak-agota kawameadekoi. Kimene-pala Yesu odene einata kakedeka.

9 Wa naniko eni tonoke keti koma nekete pake Yesu kakome okome Ali Yatenane Oyago no tuane kamoameneyakepa kimename opi enekoinakamo pa kini luaneya mema yamene wa Yesuyo oa tukaneya.

10 Nitaneyake eni oa tukakana luaneya yawa meake Yesu one tuaneke wa kamoane pou wa okanapa edeleke okato patu wa ete oto wa pitia yakakala taneya.

11 Nitaoapa Yesu yatekete ekete Mosesene totono pine toa olaukaki ali-kitame eya wa olaukakala tiki. Keraisu naniko taateko nomotoa Ilaida one namolo takoa noo wa ikino, enipa edekolo ikiti-pe-koli okome

12 Ilaida einagome padeya padeya peya nodokapiademe namolo takoa noo wa papete wia mekapiane toa eni iki. Nimini ikiyake eya wane ukuno yakamene. Ali Yatenane Oyago einagopa ete yename tete mea paya tetepo takoa wawei wa papete wia mekapianemopa edeyake wia mekaneya-pe wa yakatekoakakome okome

13 Ilaida einago wete wakapea nekeneyake padé ali-kihi kini wene ponoka toa litia tekete one tete

mekala taneya. Nipa Akolaline bokuke einagoke papete wia mekapiane toa taateko akeneya.

*Ipono Awitaneya Meane Mati Epetekanemo
(Matiu 17:14-21, Luke 9:37-43)*

¹⁴ Yesu one oyali-meneka one ete oya-lawe kakoita keti wakapea pote enekoli ali atoame o yene unukamoa kakoli enaney. Eni pake Mosesene totono pine toa olaukane ali-kitika eida kakete o yene-pala neno oa kakoli enaney.

¹⁵ Yesu eni nokale enekete eina eina e ali atoa peyame ekee wa kā oa teyapea pote makutukoa motaney.

¹⁶ Nitikoli Yesuyo e yene yatekome okome kinipa o yene edeyake agale topo takoa oa kaki-pe-kale

¹⁷ eni pake lukoa kakene ago padame topo takakome okome anu managoke agale wamoko ipono awitaneya tokale neeke auane nou wane ni nokou.

¹⁸ Anu manake ipono awinokome-kama itonoke moa aua pitikakala toa kako. Nitikale timini kabunuke lako kāua yotokoa one kime noto noto toa mekome one pakunu tau tokome temotele toa kako. Nitikala tokolo tekene neke i oyali-kitame eni ipono takoa wetekakoe wane auane nokounake takoa wetekaku pekete wili toa wakoi wa okale okome

¹⁹ ae, no kaku-pete meki ali atoa kime Akolalinemo yakoa moamikino, kini eni poane wene tewitikoa wamotoane edoane nepiane meamou. Neke mana mati no kakuta aua noo wa okale

²⁰ e yename Yesuke aua nokale iponame Yesuno lene timini enekome eina eina mati peteka peteka toa kakale itonoke aua pitalogakome welea mekale timini kabunuke lako käua yokoa kakeneya.

²¹ Nitikale Yesuyo matiyane etene yatekome okome eni ipono manipete titia awinaneya-pe wa okale okome wete dee matike lukakoa taneya.

²² Nipa lugutukoa wia tukademe iponame toe mine aua pitikakome uele pitikakome toa kakoyano, neme oyake tamedekalepa toto ela moa aua-peamene wa matiyane etename kowitaneya.

²³ Nitikale Yesuyo einagome oka agale toopitikakome okome tamedekale wa neme wini okopa nooke wene tugoa mekagomepa padele padeleta tamele tokale too-kale

²⁴ eina eina matiyane etename telo okome okome neeke wene tugakilepa tekeneke wedoane toamuku. Neeke wedoane wene tugoane memotono auapea ta wa kowitaneya.

²⁵ Nitikale kinita kakoita ali atoa teyapea koukanokoli enekome Yesuyo poane ipono kikoa okome okome kale kene ketekoa agale wamoatoko ipono ne wini mati takoa poke wa pade awinamea wa oa tukale

²⁶ iponame kä telo ootapekome eni mati itonoke aua pitikoa weleteko a kawa takoa pekeneyea. Nitikale eni mati tukome tuane tetepo taneya pa pikale enekete e yene kainya matiyame tuadeko wa okoli

²⁷ Yesuyo mati yono moa kamotokakale kamokoa kakeneya.

²⁸ Yesuyo eni mati latekateko yapu nome

mekale one oyali kidene-mene ete witimoa kakete ekete totome eni ipono oyake takoa wetekamele toamokano, edekome tokato patu-koli okome

²⁹ kini weneme dikane ipono takoa wetekamele toamokoyake Akolali kowitoa kaketepa oyake toi wa akeneya.

*Yesuyo One Tuatekamo Wa Toawea Akeneya
(Matiu 17:22-23, Luke 9:43-45)*

³⁰ Yesu one oya-laweka eni ta tewitikoa pote Galili ta ludu yakeneya. Nipa Yesuyo one oyali-kiti olaukama pokome tokome take yename polipo takakaya tokale yotokamotokome pekeneya.

³¹ Nitoa olaukama pokome okome no Ali Yatenane Oyagopa pade ali-kitame wimotoa panagome ete moa meademe toko. Moa metekale wia tukakolika ta tebolo takoa pataka-pete Akolaliyo moa kamotokoo wa okale

³² yatekete one oyali-kitame wene toameketekene neme wini okopa edemo wa okato-pe wa yakapamene piti tokale pa meaneya.

Ako Meateko Agopa Mainago Wa

*Agale Toonali Yoa Kakenemo
(Matiu 18:1-5, Luke 9:46-48)*

³³ Yesu one oyali-kiti-pala Kapaneame take nome menaney. Nitoa yapu tuapea nome mekome one oya-lawe yatekome okome kiwi ka ludu yakete edemo oa agale toonali yoma yakoi-pe-kale agale waametekoa pa meaneya.

³⁴ Nipa ako tobou meateko agopa mani ago patu wa oa takoa pili pili toma nekeneya tokome agale waametekoa meaneya.

35 Nitikoli Yesu one witipitoa mekome one mekuta noe wa one oyali-kiti motokome okome etene ako ago kawouno wene piko agopa nipa nepa pa keku ago tetepo takoa ete-kitanele takama pamene wa ootokoa mekome

36 pade mati deya one oyali-lawe kakoi pake moa kakaneya.

37 Nitoa mati tebemotokome okome panagome-kti noke toa dikane mati deya makutukoa motokomepa nipa nopala eni deko makutukoa motokome too. Panagome-kti no makutukoa motokomepa nipa no moa wetekakago-pala deko makutukoa motokome too wa Yesuyo akeneya.

Toto-pala Poi Teiamokagomepa

Nipa Toto Mape Wikome Too Wa Akenemo (Luke 9:49-50)

38 Yoneyo Yesu-pala okome okome Tikisa ago anu ukumo ne yaka. Panagome neke ibini wedekoa oapa ali-kitike awitane ipono takoa wetekakala tokale totome enekoo. Einagopa totopala opia yakago toamokolo tokome wa pade dikameamene wa kikoa okoo-kale

39 Yesuyo okome one tokalepa toma pomotono wa pade edikoa wameamene. Panagome-kti anu ibini wedekoa eni telekole tootokoapa no akoa agale wamoo.

40 Toto-pala poi teiamoko agomepa nipa toto mape wikome too.

41 Kipala nimini ukuno yakoe. Panagome-kti kiwi Keraisuno ibini pedane yene kakino, ue noomotokapouno nepio wa mama moa

nomotokoa lawetekalepa one eni tokake nami noanume wiane pewe wiou wa Yesuyo akeneya.

Yono Kawa Lene Eyame Pinali Ne Toa

*Potokakalepa Teia Wamene Wa Olaukanemo
(Matiu 18:6-9, Luke 17:1-2)*

⁴² Dikane mati nooke wene tuga meko mati etepea pomotoa likoa enoa labakagopa Akolaliyo kibu motokome dika dika toamene tete meoo. Ae, eni tete mea kibu moamomotoapa papete mati wete likoa enamene yake laukakoa tube kue matiyame one kabe kautoa kusa ue muke keti pitikaneya too tokapa epetoo toka.

⁴³ Nipa neke yoname-kiti pinali ne toa potokadekalepa yono teitapeamene. Yono duku taneyake mea kawateko take poke mea kakedekalepa nipa epetoo. Nitameneya yonota takuta kakeneya kawa poane take pekedekalepa ae nipa poo.

⁴⁴ Eidapa toe nokoa-kama kakolo tuga moamele toamoko.

⁴⁵⁻⁴⁶ Neke kawameka pinali ne toa potokadekalepa teitapea wamene. Neke kawa teitapea duku yawa kakeka mea kawateko take poke mea kakedekalepa nipa epetoo. Nitameneya neke kawata takuta kakeneya poane take moa pitikaneya mea kakedekalepa ae, nipa poo.

⁴⁷ Neke lenemeka pinali ne toa potokadekalepa lene toa wamene. Neke lene tootapeneya yakeka Akolaliyo talo toko take poke mea kakedekalepa nipa epetoo. Nitameneya neke leneta takuta kakeneya poane take moa pitikaneya mea kakedekalepa ae nipa poo.

48 Ae, eni poane takepa toe nokoa-kama kakolo oyake tuga moamele toamoko.

49 Too eni nakiyapa epetaneyaka tokolo uku. Too kabuka naki nee-kitike noa puki toa ali-kitikepa dikoa toele tadekoo.

50 Toopa epetaneyake me pokome meke toamokolopa edoa wa meke takamotoa-pe. Kiwi too kalono tou toa keneya ete oto wa odene wene piitikoa meamene wa Yesuyo akeneya.

10

Alime One Atoa Wawa

Atoame One Ali Wawa Tokoleke Olaukanemo (Matiu 19:1-12, Luke 16:18)

1 Yesuyo nimo oomotokome Galili ta tewitikoa Yudea ta ludu yawa Yodane ue ketoa eka lono piane take pome mepaneyea. Eidaka ali atoa one mekata koukoa nokala tokoli Yesuyo one tanele tokome Akolalinemo i i wa olaukoa kakeneya.

2 Parisi ali-kitika one mekata eida note likoa enekete ekete panagome-kiti one atoa pa wa wakomepa nipa Yu yene tone totono litiapa tamele toa toko-pe wa natemo omotadiya wa kakete okoli okome

3 nikepa Moseseyopa edele tamene wa akeneya-pe-kale ekete

4 Moseseyo papete one totono yametekome okome padagome one atoa pa wa wawademepa nipa namolo takoa ne wakene wakuna wa edikoa pipia wia meetekoapa pa wa wetekamele toko wa Moseseyo akeneya-koli okome

⁵ Moseseyo eni akenepa Yu yene kini kauamikihi kolotini lupi tootapeneya mekoli tokome ni akeneyea.

⁶ Nimo ikilepa taneyake *namolo namolo Akolaliyo kamate meaneya-kiti titikome latikilepa ali atoata takuta wa-kama latikala taneya.*

⁷ Nitanelekepa *alime atoa motokomepa nipa etene nineta tewitikoa wawa one atoa-pala lipukoa meoo.*

⁸ *Nipa namolo takuta letetakutukoata meaneyake naniko odene tigini tetepo tokale mekete liputakutukoata meoi.* Nitoa mekoli ipa i ago ipa i atoa wa tutu tutu wa ibini amele toameneya tokome i adona wa odene tetepo takoa oi.

⁹ *Nipa Akolaliyo moa lipukane ali atoata padameka moa letekatakutukamele toamoko wa Yesuyo oa pekeneya.*

¹⁰ *Nitoa yapu pome mekale one oyali-lawe note yatekete ekete eina agale pinepa edoa pikoto-pekolik okome*

¹¹ *panagome one atoa ne pa wa wetekatekoia pade atoa motokomepa nipa mone koua piamateko atoa motokome toko.* Nipa namolo atoa eni toa potokakome toko.

¹² *Atoameka onekane wawa pome eko alike pokomepa nipa koua piamateko alike eni pokome toko wa Yesuyo akeneyea.*

*Yesuyo Mati-kiti Epetekamotoa Kowitanemo
(Matiu 19:13-15, Luke 18:15-17)*

¹³ Wa padepete pade-kitame kini mati-kiti one yoname mitikakamotoa Yesu kakata aua nokoika one oya-laweme noameo wa kikoa akeneyea.

Make 10:14

liv

Make 10:21

14 Nitikoli enekome Yesu wene pokale okome wini mati-kiti oto nomotono, etoe. Akolaliyo one talo tokotapa kinino, noe wa yametekilepa dikane mati-kiti yametekono, oto nomotono toe.

15 Nimini ukuno yakoe. Panagopa mati-kiti Akolali like lukoa mekete tiki toa lukoa meamademe wakomepa nipa Akolaliyo talo toko take oyake pamele toamoo wa ootokoa kakome

16 eni mati-kiti tebemoa pikoa kakome Akolaliyo pewe wia yopimotoa tokome yono pia kowitzikaneya.

Kamo Tane Agoke Akenemo

(Matiu 19:16-30, Luke 18:18-30)

17 Yesu poademe tokaka panago teyapea nome wadini tukupia mekome okome epetanele toko Tikisago nepa eya wane yatekene uku. Edele tekene pa meane kama pou-pe-kale okome

18 nopa epetanele toko ago wapa wini okono, dekolo oko-pe. Epetanele-kama toko agopa Akolali odene kako. Wa pade lokoaka kawamoko.

19 Moseseyo tamene wa papete wia mekanemo neme wene toko. *Ali pade wia tukamo ni mone padane atoa liamo ni monekeya kode moamoa ni padago-pala pa puputua akoa agale wamoa ni panagoneya oa yotokoa moamoa ni neketai nekquata kei pia tamene* wa Moseseyo akeneyano, enipa neme wene toko-kale okome

20 Tikisa ago eni akenele-kama tualike laigoane yakoane toma nuku wa akeneya.

21 Nimo oa kakaka Yesuyo einago nepikakomepa wene einagoke mekakome okome wenepa tadekoyake odenele odene kateko

wene toameadekono, neke pikoya peya topo toa kue mootokoa ponopene ali atoa enoa tatia meetapeamene. Nitikepa neke kamoya a tibuke auma kakeneya enoo. Nitatekoyano, no litima namene wa okale

²² yatekome wene keda taneya wawa pekeneya. Nipa uu kamо tane ago tokome taneya.

²³ Nitikale Yesuyo one oyali-kiti enoa unukakome okome ae, kamо tane yene Akolaliyo talo toko take pikilepa etene wili tokoa kawapa piki wa akeneya.

²⁴ One eni oka agalemepa one oyali-kitane wene kainya pikanya tokome okome ae, anu mati-kiti kipala i ukumo yakoe. Akolaliyo talo toko take pikilepa etene wili wedoa tokoa kawapa poi.

²⁵ Kamelo kaido noi keneke-kiti patukoa ponokomepa nipa wedoa wili toa kawamoapa patukoa ponoo. Kamо tane ago Akolaliyo talo take ponokomepa nipa wili tokoa mati kawapa ponoo wa Yesuyo akeneya.

²⁶ Nimo okale yatekete wene kainya pianeya kakete pitia yatekete ekete kamо yeneke winimodo nimini akedekalepa Akolaliyo mani ali atoa toa moamoo wa okoli

²⁷ one oya-lawe nepikakome okome ali atoame toamatikilepa Akolaliyo oyake tamele toko. Padele padele peya tamele toko ago tokome kamо tane ali-kitika one take nomotoa ka patekamele toko wa okale

²⁸ Pitayo okome ne litima noadetepa tonekeya peya tewitikoa wawa noko-kale okome

²⁹ nimini ukuno yakoe. Panagome Akolaline epetane agalekeka noanukeka tokome one yapu

one etene nineta one laine wamene-mikiti one mati-kiti one toka ipe eya tewitikoa wakomepa

³⁰ nipa itonoke pa mekome enika eniya lukukepa ege takupeta kadukoa (100) oto mokala too. Nipa yapu nine wamene laine-mikiti mati-kiti ipe eya moapa tete-pala mokoa kawoo. Nitoa mea tukale Akolaliyo one talo tuku take mea-kama kamene wa moa kakoo.

³¹ Akolaliyopa ako yene kainya mati keku kakoa wa keku yene kainya mati ako kakoa too wa Yesuyo akeneya.

*Yesuyo One Tuateka Tebolo Takoa Akenemo
(Matiu 20:17-19, Luke 18:31-34)*

³² Yerusalem take poadete ka ludu pekete one oya-lawe naniko nomotoa Yesu one namolo kawa pekeneya. Nitoa pokale one oya-lawe wene kainya pianeya litia note ete ali atoa kutu keneya piti taneya litia note taneya. Nitikoli Yesuyo one oyali tuku kakoa (12) eko keneya witimoa aua pome kakome i i wa ete yename one-pala toatekoimo tqawea akeneya.

³³ Nitikome okome kipala i ukumo yakoe. Opa ate Yerusalem take poadete poko. Pote kakolo no Ali Yatenane Oyago panagome moa eya yenane yonoke Akolalike lodo yotokoai tiki tobou ali-kiti ni Mosesene totono pine tqa olaukaki ali-kiti kini yonoke pioo. Nitikale no wiatiki oi pedoa pitikoapa mone pa yeneke aua pote mepoi.

³⁴ Nitikoli motekete tegene matoa tekelipu toa yotoko po wapime wia toi. Nititikoa wia tukakolika ta tebolo takoa patatekaneyake kamoane pou wa Yesuyo oa pianeya.

Yame Yoneta Yesuke Lokoa Tobou Agota

*Meoukete Akenemo
(Matiu 20:20-28)*

³⁵ Yesu Yerusalem take kutu poademe pokaka Sebedine manata Yame Yoneta Yesu kakata note kakete ekete Tikisago totame takamene wa okole neme takoano ta-koli okome

³⁶ anume edele takamotoa iki-pe-kale ekete

³⁷ ne pa teleta tootapeneya meke ali atoa pawe toa talo tokaka neeke lokoa totaka panago neke nimini yono lono mea padena ago neke ewa yono lono mea yopioukete oko-koli okome

³⁸ wene toameketekete iki. Akolaliyo no ne naa wa yametekana ue metepa no tete tubeya moatekou adeka pikano, noanu noateku tetepa kitameka eni noateku toa noukete iki-pe. Noanume ue mou toa tete moateku toa kitameka moukete iki-pe-kale ekete

³⁹ nitato ta-koli okome noanume noateku uepa kitameka noadete tiki. Noanume ue mou toa tete moateku toa kitameka moadete tiki.

⁴⁰ Nitadete tikiyake ali atoa talo toane mekouta eka oka yono lonota kita tatikatakutukoane mekamele toamoko. Eka okata meatiki agotapa Akolaliyo i i wa wete wene toopianeyano, anume oyake yameamele toamoko.

⁴¹ E agotame nimo akedekoli yatekete o yene Yame Yoneta-pala wene poaneyea kakete ko oa kakeneya.

⁴² Nitikoli Yesuyo one kakuta noe wa kayo oa motokome okome mone pa yatenane tobou meki ali-kitame kini ali atoa wete toe toe wa tika tika-kama tiki. Kini ibini akene ali-kitameka ali

atoame kinikile-kama takamotoa yopikala tiki.
Enipa nimini ukutu-pe.

⁴³ Nitikala tikino, anu oya-lawe kime padé edikameamene. Nitameneya tobou ago meou wado wene piketepa kinikile toamekete kini oya-mikitane pupu takama pamene.

⁴⁴ Nipa ako odenemekene talo tou wado wene piketepa nipa kueme topo toa moa egetane ago keneya kini oya peyanele takama pamene.

⁴⁵ No Ali Yatenane Oyago taatekoane nikilepa ete yename anukule takamotoane nokouya mena. Nitameneya ete-kitanele takoane ni ali atoa peya mati anu kamatememe oto toane moadene ni nokou wa Yesuyo akeneya.

Yesuyo Leneta Lianeya Meane Ago

Batimiasi Epetekanemo

(Matiu 20:29-34, Luke 18:35-43)

⁴⁶ Yesuyo nimo oomotokome one oyali-kiti-pala Yeriko take pome mepaneyea. Wa naniko pato wa eni ta tewitikoa pokale ali atoa iti itita kawa obomoa pekeneya. Kini ponatekoiya liti leneta lianeya meane ago padé meaneya. Einagopa Timiasine mana Batimiasi wa ibini akeneya. Nitane agome ali atoa padeya-kiti manoe-kala oia meaneya.

⁴⁷ Nitoa batete matanuke eida mekome yatekale Nasarese Yesu wini ponokona wa oma ponokoinakamo yatekome telo ootapekome okome Depidi-loeke tagene ago Yesu neme no ela moamene-ye wa kayo oa meaneya.

⁴⁸ Nimo wa kayo okale e yene kainya matiyame einago kikoa ekete ekete oyakeno, wa wa okoli

kayo telo kamotokoa okome okome Depidi-loeke tagene ago no ela moamene-ye wa kā oa kakeneya.

⁴⁹ Nitikale Yesuyo yatekome witimoa kakome okome winago oto nomotono, akoe wa okale leneta liane ago kayo oa ekete Yesuyo ne kayo okono, wene weye ootokoa wete kamokoa noo wa kayo okoli

⁵⁰ one tokoo kakene pue takataapea ate tigatekoia Yesu kakata nokale

⁵¹ Yesuyo yatekome okome anume edele takamotoa oko-pe-kale okome Ali Muno anu leneta kikakoa wane uku-kale okome

⁵² nopa i agome ne oyake latekamele toko wa nooke wene tugoa mekolemepa neke leneta epetekakono, opi poano pa wa okale eina eina lene kikatapeneyea Yesu pokaka litima pekeneyea.

11

Yesu Yerusalem Take Nekenemo (Matiu 21:1-11, Luke 19:28-40, Yone 12:12-19)

¹ Yesu one oya-laweka Yerusalem take tigo-tokoa witapadete peketepa Olipe-pini tonoke latiane Besepase Besani tatake witakete Yesuyo eya taneya.

² One oyali-kiti takuta moa wetekakome okome kuka ku take poatino poe. Eni take witoa kaalaukete enekoli dogi kai tine eida po kakoa kebetaneyea kakale enoi. Eni dogi kai tine patu panagoka wete mea yawameneyano, po kotokoa oto aua notokamene.

³ Kotokoa moadete kakoli panagome dekolo moadete tiki-pe wa okalepa eya wa akamene. Ali Munoyo padele toatekole pikolo ni motokoa pokō.

Opi oto wa i wetekademe toko wa akamene wa oa wetekaneya.

⁴ Nitikale pote enekoli dogi kai tine yapu kago tiginike kebeteloganeya batete muke kakedekale kotokoa motaneyea.

⁵ Nitikoli eniya liti kakene yename enekete ekete mone dekolo kotokoa motiki-pe wa okoli

⁶ Yesuyo oa wetekakanakamo i i wa okoli nipa nitoe wa wetekaneya.

⁷ Nitikoli dogi kai aua Yesuke nekete kini tokoo kakene mamina petene kotokamoa dogi kai patu tatikakoli Yesu mea pekeneyea.

⁸ Nitoa mea pokaka ali atoa peya matiyame kini tokoo kakene mamina kotokamoa one mea poatekaka bateteke pia tatikawineya pekeneyea. Wa padeka-kitame li ludu pote yomo yenene deya tewia moa batete ludu tatikama pekeneyea.

⁹ Nitikete namolo kawa pokoi-kitameka naniko ketea kawa nokoi-kitameka agale kamotoka kamotoka toa ke ke wa oawineya pekete ekete i agopa Ali Muno patu kautakoa kama nokono, Akolali neme pewe wia yopia kamene.

¹⁰ Tone kaua ago Depidiyo papete ali atoa talo tokome tane toa opi enakale wa witademe tokono, Akolali neme yopia kamene. A tibuke meki peya one kei piامene-ye wa kolotine togete oawineya pekeneyea.

¹¹ Nitawineya pokoli Yesu Yerusalem take witakome tobou losu yapu keneke pome kakome eida pia kawa tokoya peya enetapeneyea. Nitoapa ta lima nokale tokome one oyali-kiti tuku kakopala (12) pato wa Besani take pome pipaneyea.

Yesuyo Yomo Pikipa Ku Wa Tuamoa Wa

*Kikoa Wakenemo
(Matiu 21:18-19)*

¹² Besani ta piimotekete podolikama pekete Yesu kobu tokale

¹³ ete enapekome enekale padeka mati yomo piki pade tata pitikaneya kakale enaneya. Nitaoapa ku tuaneywa patu wa pinele pome enepokale tata pitikoa kakomeke ku tuameadeka. Ku tuamateko-pete tokome taneya.

¹⁴ Ku tuameneywa kakale enekome kikoa okome okome ku wa tukile toamea. Padameka neke ku wa kotia noamoi wa kikoa akeneuya. Eni kikoa okaka one oyali-kitame yakakoa kakeneywa.

Yesu Tobou Losu Yapu Pokome Tanemo

(Matiu 21:12-17, Luke 19:45-48, Yone 2:13-22)

¹⁵ Yesuyo yomo piki kikoa oomotokome one oya-lawe-pala Yerusalem take pome kapaneywa. Nitao tobou losu yapu pome kakomepa eida-kama eya kuya topo toa kue moa tane yene poe wa wia tikataapea ni e ku take latiane kue topo toa Yudea kue lene ete mea tokoi yene kini walai-kiti moa pekatapea ni ini puluma yoa tane yenane walai-kitika moa pekatapea taneywa.

¹⁶ Nititikoa kakome okome i tobou losu yapu ludu kini topo toatikiya wa pade aua noameo wa agaleme oa ketekaneywa.

¹⁷ Nititikoa kakome okome *anu i yapupa e ku yatename no Akolali kowitoai toatiki yapu wa oi* wa papete wia mekapianeyake kimepa kode yenane kodeya paigakoa moa piai tane kota tetepo takakino, poe wa wia tikatapeneywa.

18 Yesuyo eni tanemo kugu yatekete eya alikitame Akolalike lodo yotokoai tane tobou alikitameka Mosesene totono pine toa olaukane alikitameka one katekoia wia tukatekoi oi pedoa wili tokoa kakeneya. Nipa ali atoa peyame Yesu i agome imopa i okono yakato wa ka okala tokoli tokome one piti motekete taneya.

19 Nitaneyake ta likaka Yesu one oyali-kiti-pala Yerusalem ta tewitikoa pekeneya.

*Totoa Ala Tootapeneya Kakene Yomo Piki
(Matiu 21:20-22)*

20 Podolikama likonu witia kamomotekete penekete enekoli eina yomo piki totoa ala tootapeneya kakale enaneya.

21 Nitaneyaka kakale enekome Pitayopa Yesuyo okana wene patukakale okome Tikisa ago neme abelana kikoa okana yomo piki totoa ala tootapeneya kakono, ena wa okale okome

22 Akolalike-kama wene tuga meamene.

23 Ipa nimini ukuno yakoe. Panagome-kiti poome toameneya kakome one kowitikumo taatekoia too wa wene tuga mekalepa eya too. I kako tono mati ne wete toa poke kusa ue mu kuta poke kapa wado okalepa Akolaliyo yakoa too.

24 Nitoa kowitikete-kama Akolaliyo wete yakoa tane tetepo takoa kowitikala tamene. Nitikolipa oneme etene yakoa too.

25-26 One kowitoa kaketepa kini a tibuke meko ataiyo kini poanele-kala toma pokoike po letumekakanaka kea wakome kibu moamomotono eya tamene. Panagome-kiti nepala padele poanele tokake po letu mekakanapa keane wakene kibu

moamou wa nami ete wiameamene wa Yesuyo
akeneya.

Yesu Neke Tokole Te Patu Kautakoa Kake

Toko-pe Wa Pitia Yakanemo

(Matiu 21:23-27, Luke 20:1-8)

²⁷ Yesuyo nimo oomotokome one oyali-kitipala Yerusalem take wakapea nome kananeya. Enipete Yesu losu yapu ludu yawamekaka Akola-like lodo yotokoai tane tobou ali-kitika Mosesene totono pine toa olaukane ali-kitika Kanosolo ali-kitika

²⁸ Yesu eni yakata nekete ekete neke tokolepa te patu kautakoa kake toko-pe. Teyo tamene wa okole toko-pe wa yakanokoli okome

²⁹ kipalaka yakkatekumo pikono, yakoe. Oto wa topo takoa okoli yatekenepa nipa anume toma yakulepa i ago patu kautakoane kakene tuku wane toaweane ou.

³⁰ Yoneyo ali atoa ue motokama yakilepa tene peku noa toka-pe. Akolaline peku patu. One kauamikitane peku patu. Yakouno, oe-na-kale

³¹ kini kini yakate tekete ekete edemo wa atope. Enipa Akolaline peku wa totome okolopa nipa Yone einagome oka agale edeyake yakoa moamokoi-pe wa oono, nimo wamato.

³² Nitameneya one kaua-mikitane peku noa toka wado okolopa ete ali atoame toto wia tukatikiyano. Yone einagopa Akolaline agale toaweae akane ago tadeko wa ikiya tokome nitoino, enimo waka wamato wa ete Yesu-pala ekete

³³ totome wene toamokono, tene peku noa toka patu-koli okome nipa anu toma yakulepa i ago

patu kautakoane kakene tuku wane wamou wa Yesuyo akeneya.

12

Panagono Gerepi Po Ipe Yopikane-kitame

*Tanele Adeka Pikome Akenemo
(Matiu 21:33-46, Luke 20:9-19)*

¹ Yesuyo agale pade pedoa okome okome panagome-kihi one ipe tootokoa gerepi po matatapeneyea. Nitoa pawe toa unukatekoapa one pupu yename po kū kotia pitikoa kawame kautoa tīa lobutatekoi kagono wetia latipianeya. Payaponalime ta enapea yopia meateka ludu yapuka atepea wipianeya. Nitoapa ali pademene one ipe yopikamene wa yamemotokome ta tetemada pome mepaneyea.

² Nitaneyake kū putua kibutukakoa kaka-pete pinagome eya taneya. One pupu ago pade moa wetekakome okome anu ipe yopikaki ali-mename no moateku toapa meadete tikino, motokapoano pa wa moa wetekaneya.

³ Nitikale nokale enekete one ipe yopikane ali-mename einago layo tiginime moomoa pitikoa pupuli wia padeyaka meameneyea pa pomotoa wetekaneya.

⁴ Nitaneyake pinagome pade pupu ago moa wetekakale nokale enekete wia wago bulukoa ya motokoa wetekaneya.

⁵ Nitaneyake pinagome wa pade ago moa wetekakale nokale wia tukaneya. Nitaneyake pinagome one pupu ali-kihi wa moa wetekakala

tokale einakale toa padeka-kiti layo toua wia padeka-kiti wia tukakala taneya.

⁶ Pinagome nitima pome wipitikomepa odene ago katekapitikaneyea. Einagopa one kolotini ago. One eni mana agopa kei pia makutukoa moi wa wene pikome einago ne pa wa moa wetekaneyea.

⁷ Wetekakale nokale enekete ipe yopikane yename oote tekete ekete pinagono mana ku nokona. Etename one pikoa pokaya-kiti kadimo okome kunu agono pikademe toko. One moatekoya-kiti toto moatono, wia tukatoe wa

⁸ dekoa moa wia tukamotekete gerepi po ipe tayo lono lia aua pitikapaneyea.

⁹ Nitikala taneyake ipe pinagome edoo-pe. Nipa eya too. Wakapea nokome one ipe yopikoa potokane ali-mene wia atukataapea kiwi lukuke pade-mene kime yopikamene wa yameademe toko.

¹⁰ Akolaline bokuke agale dikoa wia mekaneya pikono, yakoe.

Yapu wiane ali-kitame i yomopa poadeko wa paya tetepo takoa wakeneyake padekagome i yomopa yapu pigi wa moa wianeya.

¹¹ *Enilepa Ali Muno Akolaliyo taneya tokome ke wa kolotine mea kei piato wa wia mekapianeya.*

Eni wia mekanemopa kime oi moamokoiya-pe wa Yesuyo akeneya.

¹² Yesuyo eni pedoa okamo yatekete ekete pedoa i agome ina okana agalepa totoke akedekono, i ago dekatapea moatikiyake toko wa kakete eida oboa kakoi ali atoa piti motekete tekete wakeneya.

*Takesi Kue Pitikaneleke Pitia Yakanemo
(Matiu 22:15-22, Luke 20:20-26)*

¹³ Wa naniko Yesu-pala poi teiane yename eya taneya. Parisi ali padeka-kiti ni Erodeke timini kakoa yakene ali padeka-kiti moa wetekakete ekete Yesuyo natemoka omotono, likoa enepoatino poe wa moa wetekaneya.

¹⁴ Nitikoli pote lede pitia yatekete ekete Tikisa ago nepa nimirimo-kama oko. Nitoapa ibini akene yeneka ponopene yeneka takoa enameke Akolalinele takama pekete toatikile kiyoke-kama olaukako. Nepa nitane agono wene tekete imodo pitia yatekono, yakamene. Yu yene tone totono litiapa Lomane yatenane ako tobou ago Sisa one takesi kue pitikamato-pe, pitikato-pe wa akeneya.

¹⁵ Nitikolipa wene takuta pianeya kakete akediki wa wene tokome okome kime nopa edeyake likoa eneki-pe. Kue lene pade enouno, aua noe wa okale

¹⁶ aua note metekoli moa enekome okome i kue lene tiginikepa padane lene timini-pala ibinita wia mekaneyano, eniyatapa teneta patuno, yakouno oe-na-kale ekete tobou ago Sisa one wa okoli okome

¹⁷ ni tadekopa Sisa meatikiya-kiti ni Sisa takoa mea, Akolali meatikiya-kiti ni Akolali takoa mea tamene wa Yesuyo okale yatekete ekee wa one eni okamoke wene kainya pianeya kakeneya.

*Tuane Ali Atoa Moa Kamotokatekamo
(Matiu 22:23-33, Luke 20:27-40)*

¹⁸ Sadusi totono litiane ali padeka-kiti Yesu kakata nikilepa agale palene yakadete nekeneya.

Eni yene kini totono piane toa litiapa tuane ali atoa kamoamoi wa iki.

¹⁹ Nitane ali-kiti Yesu kakata nekete likoa enekete ekete Tikisago nepala i okomo yakamene. Moseseyo one totono wiamekakome okome panagono atoame mati opikameneyakedo einago tukalepa one wamene ago neme moa neke natono latikamene. Nipa tukanakago lukuke kawatiki mati-kiti opikamotono, nitamene wa Moseseyo akeneya.

²⁰ Odene aline mana-mikiti tatono kakoa (7) kakeneya. Namolo agome atoa moapa mati opiameneyea mea tuaneya.

²¹ Nitaneyake one liti taku takoa opiane agome einatoa moapa mati opiameneyea mea tuaneya. Nitaneyake tebolo takoa opiane agomeka einatoa moa mati opiameneyea mea tuaneya.

²² Eni wamene ali tatono kakoame (7) einatoa kibutua moma-kala nekeneyake panagonoka einatoame mati opikameneyea. Nipa tiobali mea tukala taneya. Nitikala taneyake wipitikome einatoaka tuaneya.

²³ Eni wamene-mikitame einatoa edikoa kibutua moma-kala nekeneyano, tua pokoi ali atoa Akolaliyo moa kamotokaka-pete einakatoapa mani agono natono wa tuga meope wa likoa enaneyea.

²⁴ Nimo oa likoa enekoli okome kini wini ikimopa Akolaline bokuke piko agale-pala one telekoleta wene toamekete ni iki. Enipa nimini ukutu-pe.

²⁵ Tuane ali atoa kamoaa pote a tibuke mea kaketepa alime atoa moamoa atoa alike poamoa toi. Nipa a tibuke Akolaline edelo-kiti keneya

meoi.

²⁶ Ali atoa tuapa kamo a pote mea kakimopa Moseseyo one bokuke wia mekaneya. Nipa itipono oa kakene yomo deyake Akolaline agale ludu nokome akenemo eya wa wia mekaneya. Noanupa Eberame Aisaketa Yekobe toa einagomenane Akolaliyo uku wa Akolaliyo oka toa wia mekaneya. Eni wia mekanemopa kime oi moamokoia-pe.

²⁷ Moseseyo enimo wia mekaneyano, onepa tuate ali atoane Akolali mena. Mea kama piki ali atoane Akolaliyo uku wa okome akedeko. Sadusi ali-kiti kime ali atoa tuapa wa kamo a pote mea kawamiki wa ikipa nipa ae Akolalinemo etene agopa motekete iki wa Yesuyo akeneya.

*Tobou Kakoa Akene Agale Pitia Yakenemo
(Matiu 22:34-40, Luke 10:25-28)*

²⁸ Nitoa agale topo takoa kakoika Mosesene totono pine toa olaukane ago pade nome yakakoa kakeneya. Nitoa yatekale Yesuyo eni Sadusi alikitipala agale muno kakoa oa metekale yatekome okome yonota tua agalepa e tobou kakoa akene agalepa mani-pe wa wa okale okome

²⁹ tobou kakoa akene agalepa dikoa piko. Iserele yatene anu ukumo yakoe. Tone Ali Muno Akolali wa oateko agopa Ali Muno odene meko. Oneke lokoa dikane ago pade kawamoko.

³⁰ Nitane ago kini Ali Muno Akolalike wedoa wene meko tikilepa neke tepe kolotinime toa neke yominime toa neke weneme toa neke teleme toa tamene.

³¹ Nike lokoa tobou kakoa akenepa dikoa piko. Pinali neeke wa wene meko mea mama motoko

toapa yete pade ali atoakeka wene meko mea mama moamene. Eni agaletamepa keku agale peya moa patukaneya wa Yesuyo akeneya.

³² Nimo okale einagome okome neme wini okopa nimini eke okono, Akolali wa oateko agopa one odene meko. Ni oneke lokoa dikane ago pade meamoko.

³³ Tone Akolalike wene meko tikilepa nipa tone tepe kolotinime toa tone weneme toa tone teleme toa tagataapeamedeko. Ni pinali tone wa wene meko mea mama motoko toapa yete pade ali atoakeka wedoa wene meko mea mama moamedeko. Eni totonota litia teketepe nipa sipi sipi kai eya Akolalike mea lodo yotikina toa moa patukoa epetanele-kama eni tiki wa einagome akeneya.

³⁴ Nitoa wene muno meaneya kakome okale yatekome Yesuyo okome nepa Akolaliyo ali atoa pawe toa talo tokota dekama nekedeko wa Yesuyo akeneya.

Yesuyo nimo ootokaneyake padameka agale pade wa pitia yakoaka enamene ya.

Keraisu Wa Papete Ibini Akene Agoke

Pitia Yakanemo

(Matiu 22:41-46, Luke 20:41-44)

³⁵ Yesu tobou losu yapu kakome olaukakome okome Mosesene totono pine toa olaukaki alikitame Keraisu wa papete ibini oa piane agoke eketepe onepa Depidi-loeke tawateko ago wapa olaukakala tikino, edekolo iki-pe.

³⁶ Depidiyo papete Keraisuke okomepa einagopa one Ali Muno wa akeneya. Eni akenepa

Epetane Yominiyo wene takakale Depidiyo eya wa wia mekaneya.

Ali Muno Akolaliyo anu Ali Muno ago-pala eya wa akeneya. Nepala poi tēia meki-kiti moane kawikoane neke kawane komo pikouno, anu nimini yono lono noke nepia menamene wa Akolaliyo Keraisupala akeneya.

³⁷ Depidiyo enimo wia mekakome Keraisupala einagopa one lukoane meku Ali Muno wa akeneyake kimepa Keraisupala Depidike tawateko ago wa ikino, edekolo iki-pe wa Yesuyo akeneya.

Mosesene Totono Pine Toa Olaukane Yene

*Titi Toma Pamene Wa Pubu Akenemo
(Matiu 23:1-36, Luke 11:37-54, Luke 20:45-47)*

Yesuyo nimo oa kakalepa one kakata iti itita oboa kakoi peyame ke wa yakakoa kakeneya.

³⁸ Nitimotoa olaukakome okome Mosesene totono pine toa olaukaki ali-kitame toma yakile titi toma pamene. Kini ludu mamina epetaneya wititapea kakeneya yawa ni makesike ali atoame ke wa walikitikakete yono momotada wa yawa tiki.

³⁹ Losu yapukeka tobou ali-kiti meatikita meada wa pote mepokala tiki. Toge kikakaka ibini akene yene meatikita meada wa pote mepokala tiki.

⁴⁰ Ni nepo atoa-kiti oa yotokoa kini yapu eya kode moa ni eka ali atoame kiwi kei pimota lede kowitikete kutupea pa agale likoa pikala tiki. Ae, dikaki yene Akolaliyo kibu motokomepa dika dika toamene tete meoo wa Yesuyo akeneya.

Nepo Atoame Akolaline Kue Pitikakanemo (Luke 21:1-4)

41 Wa padepete Yesu tobou losu yapu keneke kue pitikoai tokoi mete liti pome witipitoa mekome enekale ali atoame kue pitikakala tokoli enekoa meaneya. Nitoa enekoa mekaka kamo tane yene peya mati note kue ako mati pitikanokala taneyake

42 ponopeneyea meane nepo atoa pade nome dee kue waneta pitikananeya. Eni dee kue waneta koukoapa tuane kue odene latiko.

43-44 Nitikale enekome Yesuyo one oyali-kiti noe wa kayo oa motokome okome nimini ukuno yakoe. I kamo ali atoa peyamepa kinikiya tubeya pa pimota a keku-mene odene moa pitikakala tokoi. Nitikoiyake i atoamepa onekeya nateya deyake one piko toa eni moa pitikatapeka. One nee eya topo toa moateka kue peya eni pitikakome tokome e yene peya moa patukaka wa Yesuyo akeneya.

13

*Tobou Losu Yapu Tumu Tokaneya Piatekamo
(Matiu 24:1-2, Luke 21:5-6)*

1 Yesu tobou losu yapu kawa akolono witakaka one oyali padame okome okome i tobou losu yapu-kitipa koniyoya kue epetaneyame koniyo takoa wianeya kakono ena wa wedia kakome okale okome

2 i tube yapu-kiti wedoa enekamene. Eniyakiti latiane kue wili walai akatapeneyea pioo. Nipa odeneka kibutukoa piameneyea peya wia tadekaneya pa tumu tokaneya pioo wa Yesuyo akeneya.

*Ke Enekakale Mekete Tete Moatekoimo
(Matiu 24:3-14, Luke 21:7-19)*

³ Yesu tobou losu yapu eka waneke kamotoa Olige-pini tono waneke pome mepaney. One kidene eida paka witimoa mekale Pita Yameta Yone Aderuta einago-mene note kakete ekete

⁴ neme okanakalepa manipete taatekoia toko patu. Enika enile toateka tigotokalepa edeya wa adeka pipoo-pe-koli okome

⁵⁻⁶ ina okounakale wete taatekameneyake pade ali-kitame anu ibini lede wedekoa nekete ekete Keraisu taatekoane nukuno, noe wa ali atoa peya mati oa yotokoino, wedoa lene kia nepikoa meamene.

⁷ Nitoa nepikoa mekoi-petepa kini ta ludu uu wa poi toa kakoimo yakoa ni pade take poi tago wa okoimo kugu yakoa toino, piti moameamene wane uku. Enilepa taatekoia namolo takoa toatekoyake wipitia ta pade tigotokoa wete patamoo tokolo ni uku.

⁸ Ni e ku yatename poi tato wa kamoia poi teitakutukakala toi. Ni e ku tobou ali-kitike lukoa mekoi yatene ete oto wa poi toa winali yoi. Eka kuka takeka momani mati toa kobu igi-pala nokala too. Enika enilepa atoame mati opiademe namolo takoa mukiti nako toa keneya too.

⁹ Pade ali-kitame kiwi koiso akou wa Kanosolo ali-kiti koukoa mekoika lia aua pokala toi. Wa pade ali-kitame kiwi wiou wa kini losu yapukeka layo toua wieino, lene kia nepikoa meamene. Ni ako odene tobou mekoi ali-kiti mekoika ni kiwike lokoa ta yopia mekoi-kiti mekoika lia aua pote koiso akakala toi. Nitikolipa kini lene yoto kakete anukumo toawea akakala toi.

¹⁰ Nipa wipitia ta wete patameneyake namolo takoa e ku yatene pitikoi toa anukumo oa pupitikatapeoi.

¹¹ Kini eni koisoke lia aua pokoka edemo uku patu wa tepene li li wa kamotoa meameamene. Enipetepa Akolaliyo wene takaka toa okala toi. Nipa pademo pademo ikilepa kini weneme titia pade wamoi. Epetane Yomini kiwike awinokome a wa oka toa okala toi.

¹² Enipetepa wamenagome-kiti wamene wia tukamotoa moa meoo. Etename-kiti one matika wimotoa moa meoo. Wa mana kono-mikitame kini etene nineka wia tukamotoa moa mekala toi.

¹³ Anu oya-lawe kiwi no-pala odene ibini pedane yene tokale tekete ete yene peya kipala kotimi yoa meoi. Enika eni ke enekakale meake nooke wene tugoa mea togakoi-kitipa Akolaliyo toa moo wa Yesuyo akeneya.

Yerusalem Yename Ke Enekakale Mekete

Tete Mati Moatekoileke Oa Pianemo (Matiu 24:15-28, Luke 21:20-24)

¹⁴ Kitau oko wa okooya one kawamatekata moa kakaneya enoino nepio wa Yesuyo pubu oa pi-aneya. (I boku wianemekaku agome eya wane uku. Ina wianemekakumopa oi moteketepa pine toa wene taneya meati wane uku.) Yesuyo eni oa pianele taatekoia tokale eneketepa eya tamene. Yudea take mekoi-kiti tono pake pake toa pitoa pote paigakoa mepamene.

¹⁵ Yapu liti koo meapa kini yapu pikoina mopameneya pa pitoa pamene.

¹⁶ Ipe-kiti toa kawapa tigini mamina kotokoa pikoina mopameneya pa pitoa pamene.

17 Ae, mati kakene atoa-kitika mati adu tanikakoa mekoi atoa-kitika tete eni witakale manika edoa petoa pomotoa-pe.

18 Eni tetepa kalapetaka witamomotoa ta wa Akolali kowitima pamene.

19 Eni tete mati witakilepa itono tibuta latitakaneyakeka toamokale-kiti too. Eni tete witatekaneyake naniko pade edikanele wa wita-moo.

20 Akolaliyo eni tete witama pomotoa yopikoa kaka pakedo teigamoo tokapa ali atoa peya atuoi toka. Nitoi tokake one wa takoa motoka ali atoa ela motokome tokome pegene kakoa teigoo.

21 Enipetepa pade ali-kiti nekete ekete Keraisuku nokono enoe, i nokono enoe wado okolipa yakameamene.

22 Kapene yename eya wa wini oi. Keraisu nuku wa oa Akolaline agale akama nuku wa oa toi. Nitoa kiwi oa yotokadetepa padele padele telekole tokala toi. Nipa Akolaliyo takoa motane ali atoaka tolopi toa paka aua poadete wili toa kakete oyake nitamele toamokale wakala toi.

23 Nitoino, enika enile wete taatekameneyake papete i agale eni wene takapikuna. Lene kia wedoa nepikoa meamene.

*Ali Yatenane Oyali Wakapea Noatekamo
(Matiu 24:29-31, Luke 21: 25-28)*

24 Enika eni tete witoa kawa peya tokale taateko a eya too. Lou yomiyomu takoa tokene-kitika pā toamoa too.

25 A tibukeka tagoi-kiti kotia pitoa too. Ni tele taneya tibuke mekoiya peya moa peteka peteka taneya tokome ete oto wa yawa kawei,

²⁶ Nitoa kawa wipitikale enekoli nopa Ali Yat-nane Oyago wedo patu meane pā teleta toawineya noadene nokolu enoi.

²⁷ Nitaneya wakapeane nekenepa lou witia noko lonoka lou pipoko lonoka yeteka yukukataka anu papete takoane moopikou-kiti peya odeneya moa obokamotoane tekene edelo ali-kiti moane wetekou.

*Yomo Piki Tokoleke Pedoa Akenemo
(Matiu 24:32-35, Luke 21:29-33)*

²⁸ Yomo piki witakole wene taneya meamene. Papete yeneneke page kāua luno pitikakolo eneketepa poto toko tokene-mene tigotatekolo toko wa wene toi.

²⁹ Eina toa anume okounakale-kiti witatapekale eneketepa inakago wakapea noateko eni tigo-tokona wa wene toi.

³⁰ Etene nimini toatekomo ukuno yakoe. Ipete meki-kiti peya wete tuutapeameneyake kipala ina okounakale-kama taateko too.

³¹ Itono tibuta takoa pootapekolika anu agalepa pa pia-kama kawoo wa Yesuyo akeneya.

Yesu Wakapea Nikilepa Ipete Taateko

*Noo Wa Padameka Wene Toamiki
(Matiu 24:36-44)*

³² Enika enile toatekolepa ipete taateko too wa padameka wene toamiki. A tibuke meki edelo ali-kitameka wene toamiki. Akolaline mana noanumeka wene toamuku. Atai Akolaliyo odene wene toko.

³³ Enika enile toateko-pete agopa tokolo meokino, wedoa lene kia nepikoa-kama meamene.

³⁴ Kipala ina okouna toane opika pedoane agale ukuno, yakoe. Panago ta tetemada poademe one yapu kakome eya toko. One pupu takaki ali-mene pupu tutu tutu wa takamotoa tatikamu toko. Nitooapa kagoke payaponali kako agoka wedoa nepikamene wa kakamotokome poko.

³⁵ Yapu pinago kotikataapea wakapea noademe tokono, payaponali kako ago toko toa wedoa lene kia nepikamene. Piadete mekika noko patu. Tube likonu noko patu. Titia ogada kā oko-pete noko patu. Likonu kama witia noko patu.

³⁶ Atu piamekakoa kotikataapea nokayano, wedoa nepikoa kamene.

³⁷ Kipala i ukumopa ali atoa peya-pala kiki-likoane ukuno, wedoa lene kia nepikamene wa Yesuyo akeneya.

14

Yesu-pala Kotina Tanemo

(Matiu 26:1-5, Luke 22:1-2, Yone 11:45-53)

¹ Yu yenamepa kini kaua-mikiti Idipi take mekakoa edelo ago patukoa wia tukamenele oi pikoa meketepa malike-kama toge kima nekeneya. Eni toge kia mono mono akamene palawe wane-kiti yoa noatekoi oi tigotokoa nekeneya. Eni toatekoi ta takupeta pa ete pikale Akolalike lodo yotokoai tane tobou ali-kitameka Mosesene totono pine toa olaukane ali-kitameka Yesu wiadete edoa yotokoai dekua moato patu wa wili tokoa kakeneya.

² Nitikete ekete toge kikoo-petepa dekua moamato. Pa ali atoame toto-pala wene poa wili

walai wa kaweino, enipete deko a moamato wa oa tukaneya.

Yesuno Tobouke Padeya Kalono Taneya

*Pekoa Yotokanemo
(Matiu 26:6-13, Yone 12:1-8)*

³ Wa pade-pete Yesu Besani take kedime nakeneya mekanakago Saimone einagono yapu meaneya. Eida mekome nee nakaka atoa padame padeya kalono taneya alabase kueme latiane mete keneke meko aua nekeneya. Eniyapa nado wa ibini akeneya. Kue ako mati wetekoa mootokoa aua nome mete kautukoa kalono taneya Yesuno wagoke peko a yotokatapeneya.

⁴ Nitikale enekete pade kakoi-kiti wene poaney a kakete oote tekete ekete ina peko a yotokakilepa pale tokano, edeya weike toka-pe.

⁵ Inakeyapa totome topo toa kue moo tokapa nipa kina kue ege kadukaka ko melepume kakoa (300) moa ponopene ali atoa tatikoo toka wa einatoa-pala poanemo oa kakoli

⁶ yatekome Yesuyo okome i atoane wene dekolo potokaki-pe. Oyakeno, wawe. Einapa anu koniyole takakana.

⁷ Ponopene ali atoa enabuna kiwi pakeke mekala tikino, kini wene witikolo-kama oyake auapeamele toko. Noanupa kiwi pakeke pa tekei meku.

⁸ I atoame nopala padele epeteko a toatekale eni tokona. Ina kalono taneya anu tiginike peko a yotokakanapa no tuaneya piateku tigo-tokolo tokome nina nodokoa takapikana.

⁹ Nitikakona tokolo eya wane uku. Anukumo ta piko peyake oa aua yakoi-kitame oa pupitikama peketepa i atoame ina takakamo-kitika oa pupitikoi. Nipa ta piko peyake mekoi-kitame one wene taneya memotoa nitoi wa Yesuyo akeneya.

*Yudaseyo Yesu Moa Meateka Oi Pedapianemo
(Matiu 26:14-16, Luke 22:3-6)*

¹⁰ Nititikaneyake Yesuno tuku kakoa (12) oyali-kiti panago Yudase Isekariose einagome eya taneya. Akolalike lodo yotokoai tane tobou ali-kiti mekoita pokome okome Yesu einago kini yonoke moane piou wa opaneya.

¹¹ Nimo okale yatekete wedia mekete ekete nipa ne kue meoono, nitoa ta wa okoli einapete laigoa Yesu moa metekome toatekale wene kibutuma yakeneya.

Edelo Ago Idipi Ta Patukoa Iserele Yene

*Toa Motane Oi Nokale Toge Nee Nakenemo
(Matiu 26:17-25, Luke 22:7-14, 21-23, Yone
13:21-30)*

¹² Yu yename mono mono akamene pa palawe wane-kiti yoa toge kikilepa namolo ta pataka-pete eina togeke wia kiatekoi sipi sipi kai tine-pala moa wia kikala taneya. Enile toatekoi-petepa Yesuno oyali-kiti Yesuke nekete ekete edelo ago patukane wa ibini oko toge nee maida nodokoa piatoa-pe wa okoli okome

¹³ Yerusalem pekete enekoli ali pade one wagoke ue mete kakalogoa aua nome kotukale enoino, einago litima pamene.

¹⁴ Litia peketepa one tuapea poka yapu pinago-pala eya wa akamene. Tikisa agome i toge kia

noatekoyapa one oya-lawe-pala opiane mekene nouno, neke ugu yene note meatiki lono yamea ta wa akamene.

¹⁵ Nimo okoli yatekome pinagome ako yuane yapu yametekome toto meateko walai-kiti-pala nodokapianeya yameoono, eida pote kakete tone toge kia noatekoya nodokamene. Nodokapoatino poe wa Yesuyo one oyali takuta takoa moa wetekaneya.

¹⁶ Nitikale Yerusalem take pekete enekoli Yesuyo eina okanakale nimini tadeka. Nitadekale einata kini toge kia noatekoiya nodokaneya.

¹⁷ Nititikaneyake ta likaka Yesu one ete oya-kiti-pala eida nome menaney.

¹⁸ Nitoapa eina nee noa mekete Yesuyo okome etene nimini ukuno yakamene. Anu oya-lawe nopala opia mekete nee naki-kiti kiwi padame no-pala poi t̄ejane yenane yonoke moa pioo wa okale

¹⁹ odene odene wa mekoi peyame Yesu ete yatekete ekete Ali Muno wini okolepa noanume toatekumo eke oko-pe wa wene keda toologaneya mekete yakakala tokoli okome

²⁰ anu tuku kakoa (12) oya-lawe kiwi panago no-pala opia mekome odene okolo kagonoke nee moa tadoata nako agopa no moa meatekago too.

²¹ Nipa Akolaline bokuke Ali Yatenane Oyago nopala eni toatekamo papete wia mekapiane toane taatekoane tuou. Ae, no witikamotoa moa meateko agomepa dika dika toamene tete moono, eni tete moamademe tokome einago opiameneya too tokapa nipa epetoo tokake opa ae wa Yesuyo akeneya.

Yesuyo One Oyali-kiti Palawe Wane-pala

Gerepi Po Ku Ueta Moa Lawetekome Akenemo

(Matiu 26:26-30, Luke 22:14-20, 1 Korine 11:23-

25)

²² Eni nee noa mekete Yesuyo palawe wane moa Akolali-pala ke wa popimotokome tatikamu tokome okome ipa anu tiginino, moa namene wa moa lawetaneyea.

²³ Nititikoa gerepi po ku ueka meteke mekaneya katekamoa Akolali-pala ke wa oa one oyali-kiti metekale peyame moa yumoanakeneya.

²⁴ Nitikoli okome Akolaliyo ali atoame wenele toatekoi totono oi pedoa pikana toane kadimo oane piku. Ipa anu kamate. Ali atoa peya matike tukene anu kamate ponmotou.

²⁵ Kipala imopa etene nimini ukuno yakoe. Akolaliyo talo toko take kipala opiane mekene gerepi po ku ue weneywa moane nou. Nitatekuyake papete pade wa nakileka toamou wa oa

²⁶ peya takakome eni ketea lo pade oomoteketepa Olipe-pini tono waneke pote witapaneyea.

Yesuyo Pita Neme No I Ago Wene Toamuku

Wa Akoa Waoo Wa Oa Pianemo

(Matiu 26:31-35, Luke 22:31-34, Yone 13:36-38)

²⁷ Yesuyo Olipe-pini tonoke pome mekome okome kiwi peyame no wawa tia tadataapeoi. Nipa Akolaline bokuke nopala toatekoileke panagome papete eya wa wia mekapiane toa taatekoia nitoi. *Akolali noanume sipi sipi kai-kiti talo toko ago witikolu one sipi sipi kai tadoa pootapeoi wa wia mekaneya.*

²⁸ Eina wia mekapiane toane taatekoane tukoluka Akolaliyo moa kamotokoo. Nitikale kamoane kiwi naniko nomotoane no namolo takoane Galili take pone mepou wa okale

²⁹ Pitayo okome i ali peyame ne tia tadatapekolika noanume ne tiane padeka poamou-kale okome

³⁰ nepala i ukumodo yakamene. Opi likonu ali ogadame ka takupeta wete wameneyake neme no i ago wene toamuku wa tebolo-peta akoa wawade toko-kale okome

³¹ ne witikete nopala dekoa witikolika ne einago wene toamuku wane wawamou wa Pitayo okale ete peyameka oneme eina okana toa okala taneya.

Yesu Gesemani Take Pome Kowitipanemo

(Matiu 26:36-46, Luke 22:39-46)

³² Nimo okoli Yesuyo patoe wa Gesemani take pome mepaney. Nitoa mekome Yesuyo one oyali-kiti-pala okome no yeka tutu pone kakene kowitipukuno, ita meamene wa ootokoapa

³³ Yame Yoneta Pita toa aua pokome ela matiyame tuaneya tepene-pala mama mati motaney. pekeneya.

³⁴ Nitaneyakakome okome no wene keda mati tokolo tuadene meku. Mugili-pala topelekono, ita nepikoa meamene wa oomotokome

³⁵ nami-takakoa eko keneya kidene pome itonoke aua pitalogoa kowitaneya. Nipa onepala toatekale katekakamotoa kowitaneya.

³⁶ Nitoa kowitikome okome Atai padele padele peya neme tamele toko. Meteke no noateku ue enekupa no tete moatekulu enipa tokono, ete pedekakamene. Nimo wane kowitikuyake anu

wene pikule toa wane ekene wamuku. Neke wene pikole tou wa kowitimotokome

³⁷ one oyali-mene mekoita wakapea nokome enekale atu pia meadekoi. Nitadekoli Pita yatekome okome atu pia meko-pe. Pa nateya opia me me teke nepikamele toamoko-pe.

³⁸ Setanuyo kiwi likoa enekoyano, wedoa lene kia mekete kowitamene. Lene kiane nepiane meou wa wene pikiyake tiginipa popeyo noamokolo atu wini pia meadiki wa Yesuyo oomotokome

³⁹ kutu keneya wa pome kowitikome one namolona okana toa lokoa kowitaneya.

⁴⁰ Nitoa kowitimotokome wa wakapea nokome enekale pa atu pia meadekoi. Atume moa maleou takakale pitaneyea. Nitoa atu kiyo kiyo kamokakete one-pala oatekoi agopa tokale meaneya.

⁴¹ Nitaneyake eina toa pome mea tebolo takoa wakapea nokome enekome okome kiwi pa koome tuaneyea mekete atu-kala pia meki-pe. Opi oyakeno. No Ali Yatenane Oyagopa Akolaline agale tagoa toamiki yenane witikamotoa moa meateko ago ku nokono,

⁴² wete kamokoa kawe. Kotua pekete pato wa akeneya.

Yesu Dekoa Motanemo

(Matiu 26:47-56, Luke 22:47-53, Yone 18: 3-12)

⁴³ Yesuyo enimo oa kakaka one tuku kakoa (12) oya ali-kiti pade Yudase wete eni nekeneya. Nokale ali peya mati koukoa kepete tue layo katekamo katekamo toa obomoa nekeneya. Nipa

eya ali-kiti Akolalike lodo yotokoai tane tobou ali-kiti ni Mosesene totono pine toa olaukane ali-kiti ni ete tobou ali-kiti enika eni ali peyame Yesu deko a motokapoatino poe wa wetekakoli nekeneya.

44-45 Wetekakoli neketepa Yudase Yesu kakata wete nome awa, Tikisago wa ootokoa Yesu nunu akeneya. Enipa papete Yesu deko a monatekoi yene-pala oi pedoa pikana toa nitaneya. Nipa one pone nunu opokou agopa Yesu eni toono, dekataapea moa tapu toa aua pamene wa oi pedoa pikana toa taneya.

46 Nitikale Yudase-pala opia nekene ali-kitame Yesu deko a monaneya.

47 Nitikoli one kakaya liti kakene oyago padame panago wiou wa one kepete tue witimoapa panagono kapidi pine takoa pitikaneya. Einakagopa ako odene mekome Akolalike lodo yotokoai tane tobou agono pupu ago.

48 Nitaneyake Yesuyo e yene-pala okome kini kepete tue lua note layo tigini-pala nidikoa aua nikino, kode ago tetepo takakete no deko a moadete niki-pe.

49 Ta pataka abuna tobou losu yapuke kiwi kakakoane keleyo pone olaukoane kakounake no eida deko a moamokoina. Dekale wakoti-pe. Akolaline bokuke nooke papete wia mekapianele taateko a toono, toe wa okale

50 one oya-lawe peyame one tia wawa pitoa pootapeneyea.

51 Nitikoli tuali pade odene pue petene eweteta-pea kakeneya Yesu aua pokoka litima pekeneya. Nitikale pade-kitame dekatapekoli

⁵² one pue laukalogakome pa pitoa pekeneya.

*Yesu Kanosolo Yenane Leneke Moa Kakanemo
(Matiu 26:57-68, Luke 22:54-55, 63-71, Yone
18:13-14, 19-24)*

⁵³ E yename Yesu dekoa moomoteketepa ako odene mekome Akolalike lodo yotokoai tane tobou agono yapu aua pekeneya. Einagono yapupa eya ali-kiti Akolalike lodo yotokoai tane tobou ali-kiti ni Kanosolo ali-kiti ni Mosesene totono pine toa olaukane ali-kiti eida wete ponete koukoa meponaneya.

⁵⁴ Yesu einagono yapuke aua pokoli Pita kutu mati kawatati toma nome tobou agono kela pawe patukoa one pupu takane yene pakeke nome menaneyea. Nome mekome yono toe yame yame toa meaneya.

⁵⁵ Nitikakoa Akolalike lodo yotokoai tane tobou ali-kitameka ete Kanosolo ali peyameka Yesu wia tukatekoile wili toa kawa tuku taneyake one koiso akoa wia tukatekoile pade toameneya.

⁵⁶ Nipa ali kainya matiyame dika dika wa kapene wakakete eketeke odenemo wameneya.

⁵⁷ Nitaneyake pade ali-kiti kamokoa kakete kapene wakakete ekete

⁵⁸ i agome eya wa okale yatekoo. I kako tobou losu yapu alime wianeya kēaweane tadekatapeou. Wa ta tebolo-peta lia patakale eni panamene moomoane alime yono petekoa wiame yapu awitikakoane wa wiou wa oka wa akeneya.

⁵⁹ Nimo waka eketeke padame pade oa padame pade oa odene kotu kakameneya.

⁶⁰ Nitikoli ako tobou meane ago kamokoa e yenane lene yoto kakome Yesu pitia yatekome

okome neme okale yatekoinakamo eni akoa ikino,
neme pademo topo takoa enike oo-pe wa okale

⁶¹ Yesuyo agale wametekoa pa kakeneya. Nitikale ako tobou meane agome wa pitia yatekome okome nepa Keraisu toto Yu yatename kei-kama piateko ago Akolaline mana-pe-kale okome

⁶² eeno, nopa einago. Ni naniko Ali Yatenane Oyago nopa telekole-kama toko ago Akolaline ni-mini yono lono kawane tibu wedo patu meane wakapeane nokolu enoi wa okale

⁶³ ako tobou ago pinali one kakene mamina tjawea iyatapekome okome okome oyakeno, i agome tane poanele i i wa tqawea omotoa wa pade ali-kiti totome wa tuku toa moa kakateko toa mena.

⁶⁴ I agome Akolali taumada toa okale kime yatekoinano, edele tato-pe-kale peyame ekete i ago wia tukamedekona wa ootapeneya.

⁶⁵ Nititikoa pade-kitame Yesuke tekelipu toa yotokoa one leneta yoname ketekakoa kawa yumi mutua pia witikete ekete nepa teyo witikatope wa tea agale akeneya. Nitoapa i ago moe wa tobou agono poyo ali-kiti metekoli motekete kala wikala taneya.

*Pitayo Yesu Akoa Wakenemo
(Matiu 26:69-75, Luke 22:56-62, Yone 18:15-18,
25-27)*

⁶⁶ E yename ako yapu nitoa kamotoa Pita akolono tobou agono yapu pomale pa eida meaneya. Eidapa tobou agono pupu takane atoa pade nokome enekale

67 Pitayo one yono toe yame yame toa mekale enekome okome neka i Nasarese Yesu-pala opia yake toka-kale okome

68 mena, neke wini oko agale yakamekene wene toamuku wa oomotokome kago keteponeke pome kapaneya.

69 Pome kapokale eina pupu takane atoa wa nokome Pita enekome eniya liti kakoi yene-pala okome i agoka Yesuno oyali tadeko wa okale

70 eina toa Pitayo okome no pade one oyago mena wa akeneya. Wa naniko keneya eniya liti kakoi-kitame Pita-pala ekete nepa Galili take agono, Yesuno oya-lawe-pala opia yakago tadeko wa okoli okome

71 kapene wakadekolupa Akolaliyo no kibu momotouno, Akolaliyo yakakoane etene nimini ukuno, kini wini iki agopa wene toamuku wa oa kakaka

72 eina eina taku takoa ali ogadame kā oa kakeneya. Nitikalepa Yesuyo eya wa okana ali ogadame taku takoa kā wete wamokaka no i ago wene toamuku wa neme no tebolo-peta akoa wawade toko wa Yesuyo okana one wene ponokale akolono pome komo kāta pitikoa kapaneya.

15

Pailaseyo Yesu Pitia Yakanemo

(*Matiu 27:1-2, 11-14, Luke 23:1-5, Yone 18:28-38*)

1 Podolikama ta pene patakaka Akolalike lodo yotokoai tane tobou ali-kitika Kanosolo ali-kitika Mosesene totono pine toa olaukane ali-kitika eni yene peyame Yesu wia tukatekoi oi pedoa pia

meaneya. Nititikoa one yonoke po kakamotekete Pailase mekata koiso akakamotoa aua pote kakaneyea.

² Nitikoli Pailaseyo Yesu yatekome okome nepa Yu yene peya lukoa meki ako tobou ago-pe-kale okome nopa einago wa wini okana wa akeneya.

³ Nitaneyake Akolalike lodo yotokoai tane tobou ali-kitame Yesu i agome dika dika wa akoa okala tokoli

⁴ Pailaseyo Yesu wa yatekome okome opa nipa padele padelepa neme tanemo-kala akoa ikino, neke yakoa edemo oo-pe-kale

⁵ Yesuyo agale wametekoa pa kakale Pailase wene kainya pia kakeneya.

Yesu Wia Tukamotoa Oa Tukanemo

(Matiu 27:15-26, Luke 23:13-25, Yone 18:39-19:16)

⁶ Edelo ago patukane wa ibini akene toge oi ponokale-kama Pailaseyo eya tokala taneya. Yu yenamepa po yapu pitane ago pade po kotokoa one yapu wetekaka wa takoa okoi agopa moa wetekakala taneya.

⁷ Eina toge kiane-pete Yu ali-kiti po yapu moa pitikaneya meanepa Lomane yene-pala poi kamotokoa pade ali atoa witaneyake ni moa pitikaneya meaneya. Nitane ago pade Barabasi po yapu eida moa pitikaneya.

⁸ Yu yene Pailase mekata obomoa note kakete ekete eina tokala tokana toa opika nitoa ta wa koukoaa note onaneyea.

⁹ Nitikoli okome Yu yene kiwi peya lukoa meki ago po kotokoane wetekakamotoa iki-pe wa yakaneya.

¹⁰ Nipa e yenane Yesu aua nikilepa pa puputua wene pokete ni tokoi wa wene tokome akeneya.

¹¹ Nitaneyake Akolalike lodo yotokoai tane tobou ali-kitamepa eida oboa kakene ali atoa oa kamotokakete ekete Pailase-pala eya wa atoe. Barabasi einago po kotokoa wetekaka wa atoe wa oa kamotokaneya.

¹² Nimo wa kayo okala tokoli Pailaseyo okome kiwi Yu yene peya lukoa meki agopa edekamene wa iki-pe wa okale

¹³ winago yomo lekaneyake wia dekakamotonota wa kayo oa kakoli okome

¹⁴ one poanele edele taneyake iki-pe-kale agale telo oa kamotokoa kakete ekete winago yomo lekaneyake wia dekakamotonota wa awitikoa tika tika taneya.

¹⁵ Nitikoli Pailaseyo e yenane wene epetekademe tokome Barabasi moa po kotokoa wetekakaneya. Nititikoapa Yesu po wapime wiamene wa one poyo yene moa metekale witikoli yomo lekaneyake wia dekakoatino toe wa nitatekoi poyo yene moa metaneya.

*Poyo Yenane Yesu Taumada Toa Kakenemo
(Matiu 27:27-31, Yone 19:2-3)*

¹⁶ Nitikale poyo yenane Yesu moomotekete tobou ago Pailaseyo ta talo tokome meka yapuke aua pote kakapaneya. Nitoapa ete poyo ali peya koukoaa mootokoa eya taneya.

¹⁷ Kikome kiane mamina petene pade moa kakaneya. Nititikoa kagani kakene po ludu moa makatikoa one wagoke lobutukaneya.

18 Nitoa lobutukakoa yono wia pitikakete ekete Yu yene lukoa meki Ali Muno ne mea kamene-ye wa taumada toa kakeneya.

19 Nitapa tauwe wata wakoa moa one tobou wane wia oneke tekeliwu toa yotokakala taneya.

20 Edikoa paya tobou ago tetepo takatekoapa one tokoo kakakoina mamina petene kotokoa one namolo kakene mamina petene wa moa kakamotekete yomo lekaneyake wia dekadete aua pekeneya.

Yesu Yomo Lekaneyake Wia Dekanemo

(Matiu 27:32-44, Luke 23:26-43, Yone 19:17-27)

21 Yesu-pala eni aua pokoka Sairini take ago Saimone tayo lono kawa nokome kotukale enekete ekete i ago wia dekateko yomopa neme aukoano noo wa dekoa moa aukaneya. Saimone einagopa wamenata Alekesada Rupusitane etene.

22 Nitoa aua pekete Gologosa wa ibini akene take witapanuya. Gologosa tone agaleke eketepa ali wago wa ekete oo.

23 Nitaneta Yesu-pala aua pote witakete gerepi po kū ue-pala mire yobotonota eleteko lawetekoli noamademe wakeneya.

24 Nitikale yomo lekaneyake wia dekateko kakete ekete one kakene mamina-mene tatiato wa poyo ali-mename tadu tootokoa tatite taneya.

25 Einata einapete lou pini pog i kakoake (9 kilokoke) Yesu wia dekaloganuya.

26 One eni wia dekalogane yomo munokepa pipia eya wa wia mekateko dekaloganuya. I agopa Yu yene lukoa meki tobou ago. Nipa one

koiso akoa akenemo eni wia mekatekoa dekaloganeya.

²⁷ Yesu eni wia dekaketepa kode agota takuta eka okata yomo padetake wia dekakala taneya. Nipa panago Yesuno nimini yono lono wia dekoa padena ago one ewa yono lono wia dekoa taneya.

²⁸⁻²⁹ Nititikaneyake eida ponokoi-kitame tedu metekete ekete beita, nepa tone tobou losu yapu odepeta keataapeanepa wa ta tebolo lia patakale eni luku wa wiou wa okanakagono,

³⁰ pinali neke toa moano, yomo lekaneya ludu ketipea koa noo-na wa tema ponokala taneya.

³¹ Eina toa Akolalike lodo yotokoai tane tobou ali-kitameka Mosesene totono pine toa olaukane ali-kitameka dikoa tedu mea oote tekete ekete i agome ete pade ali atoa toa motokoyake pinali one pade wa toa moamele toamoko.

³² Beita, Keraisu Iserele yene lukoa meki tobou ago one wia dekane yomo ludu koa nokale eneketepa i agopa Keraisu tadeko wa totome wene too wa tea agale okala taneya. Yesu-pala odeneka wia dekane kode agotameka edikoa tea agale okala taneya.

Yesu Tukome Tuanemo

(Matiu 27:45-56, Luke 23:44-49, Yone 19:28-30)

³³ Lou mataike ponome kakaka (lou pini 12 kilokoke) ta peya likatapeneya. Lou pene webokaka (lou pini 3 kilokoke) pa ta likoa kakeneya.

³⁴ Einapete lou pene webokaka (lou pini 3 kilokoke) Yesuyo telo kayo okome okome Eloí Eloí lama sabakani wa kayo akeneya. Enipa anu Akolali anu Akolali neme no dekolo tewitikoa wakope wa tone agaleke ekete oko.

³⁵ Nimo okale yatekete eniya liti kakoi-kitame ekete enipa Ilaida kayo okome toko wa akeneya.

³⁶ Nitoa yakatekoa panagome okome ue nodome tukome ni oko wa teyapea pome ue takamoateka obi wane pade mopaneya. Mootokoapa kou tane gerepi po kū uele tadamo tauwe wata munoke togototokoa aua nome kakome mitumoa na wa kabunuke pia lete lete tokome okome Ilaidayo i ago kiitapea monoko patuno, tokale enato wa nepikoa kakeneya.

³⁷ Nitoa nepikoa kakoli Yesu telo ootapekomepa tukome tuaney.

³⁸ One tukakapa eina eina kuna tobou losu yapu keneke eya mamina petene Akolali meko lono wa akene yapu luku olege toa ketekalogane mamina petenepa ete oto wa iyawea tukaketikaneya.

³⁹ Nika Yesu lene timini takoa piane lono kakene tobou poyo agome Yesu tukome tokale enekome okome ae i agopa nimini Akolaline mana tadeko wa enekoa kakeneya.

⁴⁰ Pade atoa-kitika eka mati kakete enekoa kakeneya. Eni kakoi atoa-kiti pakeke eya atoa-mene kakeneya. Pade Magadala Maria. Ni padena Maria onepa Yame Yosepetane nine. Pade atoa one ibinipa Salomi.

⁴¹ Einatoa-menepa Yesu Galili ta ludu pima yakaka one auapema yakeneya. Yerusalem take Yesu-pala opia note kanane atoa-kitika eida nepikoa kakeneya.

*Yesuno Tigini Kota Keneke Moa Pipanemo
(Matiu 27:57-61, Luke 23:50-56, Yone 19:38-42)*

42-43 Ta likaka ibini akene Kanosolo ago Arimasia take ago Yosepe Pailase mekata pekeneya. Einagomepa Akolaliyo ali atoa keleyo talo toatekale nepia meaneya. Ni agopa podolikama ko mea pupu toamateka-pete tokale tokome Pailase mekata atiki toa pokome Yesuno tigini moane pipouno, mea ta wa opaneya.

44 Nimo Yesu wete tuameneyake oko wa Pailaseyo wene pikome one tobou poyo ago ne noo wa kayo oa motokome okome Yesu winakago tukome tuka-pe-kale okome

45 wete tukome tuka wa okale okome nipa mopoano pa wa Yosepe yametaneya.

46 Nitikale pome mootokoapa ake tane mamma petene moa tatilogoa Yesuno tigini pia ewetetapeneya. Nitimotokome aua pomepa pala padaneta kokapiane kota keneke pipaney. Nitaneta Yesuno tigini piitikoa kue makai uoya koketekoa moa kabunu ketekalogoa pekeneya.

47 Yesu eni moa pipokata eya atoatame Magadala Maria Yosesene nine Mariatame enaneya.

16

Yesu Kamoa Pekenemo

(Matiu 28:1-8, Luke 24:1-12, Yone 20:1-10)

1 Yu yene kini eina ko mea pupu toamatekoi-pete ponotekeneyake lou pipokaka eya atoa-mene Magadala Maria Yamene nine Mariata Salomi toa Yesuno tiginike peko yotokoa kalono takatekoiya topo toa motokapianey.

2 Nitaneyake podolikama egeme ta tuei teigaka kamomoteketepa Yesuno tigini moa pipane kotate pekeneya.

3 Poadete pekete kini-mene oote tekete ekete eina ketekalogane kue teyo ete koketekoa moa pikako patu wa oma pekeneya.

4 Nitoa pekete enekoli paka koketekaneya kakale enaneyya. Eina kota kabunu ketekalogane kuepa yau petene makai wane uoya.

5 Yesuno tigini pipane kota keneke eida tuapea pekete enekoli tuali pade ake tane mamina kakeneya nimini yono lono mekale enekete ekee wa piti tokale kakeneya.

6 Nitikoli einagome okome piti moameo. Eina wia dekakoina Nasarese Yesu kime tuku tonadikiyake inakago ita pihamokono, wete kamokoa poka. One pianeta luku ino enoe wa yametaneyya.

7 Nitikome okome Yesuno oyali-kitika Pitaka yakamotonu imo wa akapamene. Inakago wete kamoa poka. Kiwi Galili take naniko nomotoa one namolo takoa pokono, eni take penekete enoi. Yesuyo kipala namolo okana toa Galili take peketepa enoino, poatino poe wa akapamene wa edelo agome einatoa-mene-pala akeneya.

8 Nimo okale eina kota keneke kawa akolono pitoa pekeneya. Kolu kolume tua wene-pala kainya pianeya tokome taneya. Nitoa piti tokale tekete pade ali atoa eneketeka toawea wame-tekaneya.

Yesuyo One Lene Timini

*Magadala Maria Yametanemo
(Matiu 28:9-10, Yone 20:11-18)*

9 Egeme ta pataka-pete lou witia nokaka Yesu kamo pekeneya. Kamo pokome one lene timini Magadala Maria namolo takoa yametaneya. Namolopa einatoake tatono kakoa (7) ipono awitaneyake Yesuyo takoa wetekakaneya.

10 Einatoame Yesu enemotokomepa one-pala opia yakene ali-kiti komo oa tumai mekoita pome opaneya.

11 Yesu kamokoa yakole enoane nuku wa eni opokaleka nimini okono wene piamekete pa tumai meaneya.

12 Wa padepete ali takuta padeka lono kebono takoa piane take poadete pokoli Yesu padele toatapeane tigini kakeneya nokome one lene timini yametaneya.

13 Nitikale enemotekete wa wakapea ete yene mekoita pote ile enekoo wa opokoli enika yakoa moameneya.

14 Wa naniko one oyali-kiti tuku melepu kakoa (11) yene oboa mekete ne nakoita nokome one lene timini yamenaney. Nitinokomepa one wete tuameneyake mekome okanakamo yakoa moamokoli tokome kikoa akeneya. One tuake kamo nokale enemotekete tqawea onokala tanekitame okoimoka kolotini lupi tootokaney mea yakamokoli tokome nika kikoa akeneya.

15 Nititikoa kakome okome ali atoa ta pikopeyake pitiki toa anukumo oa pupitikakapoatino poe.

16 Anukumo yakoa mootokoa ue motokoi yenepa Akolaliyo toa mokala too. Nitameneya anukumo yakoa moamokoi yenepa nipa Akolaliyo kibu mootokoa wawoo.

17 Anukumo yakoa motokoi yenamepa Akola-line tele patu kautakoa kakete tadiki wa etekitame wene tomotoa eya telekole toma poi. No ibini wedekoa ipono-kiti takoa wetekoa ni weneya agaleke pademo pademo oa

18 ni ali tania tukakoya kaya katekamoake tuamoan ni ali tukakoya ue moa noake tuamoan toi. Ni eya kuya yene taneya mekoi-kitika yono pikoli latoa pokala toi wa Yesuyo oa kakeneya.

Yesu A Tibuke Atepea Aua Pekenemo

(Luke 24:50-53, Aposelo 1:9-11)

19 Ali Muno Yesuyo one oyali-kiti-pala eni ko ootokoa kakale Akolaliyo one tibuke atepea aua pokale pome Akolaline nimini yono lono mepaneya.

20 Nitaneyake one oya-laweme Yesunomo ta piko peyake oa pupitikama pekeneya. Nipa Ali Muno agome auapea yopia kakale ele kule telekole-pala toma yakeneya. Nitikoli enekete ali atoame inapa nimini akediki wa Yesunomo yakoa mokala taneya.

**Weneya Totono Keraisu Yesunomo
The New Testament in the Witu Language (also known
as the Wiru Language) of Papua New Guinea
Nupela Testamen long tokples Witu long Niugini**

copyright © 1990, 1992 Wycliffe Bible Translators, Inc.

Language: Witu (Wiru)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

PDF generated using Haiola and XeLaTeX on 18 Apr 2025 from source files dated 31 Aug 2023

160088da-6131-52e6-9b0f-c3dc6e8c6abb